

1 Korint

¹⁻² Anut ilon yen ak ago, ñai Pol, Jesus Kristus san aposel ñilasa wo igiag a. Ñai, agod idsad teid Sostenis dam girek en an Anut san Kris midaen a Korint na amado dan sam na miganeg ipalu ya. Anut an igian go Jesus Kristus da itumanan go inanen tamolpein gun ak alasa ya. An agod tamolpein a tan fidian lo dumado dugo, idsad Tubun ak Jesus Kristus yan an lo dugudani dan dida, an sam na girek en miganeg ipalu ya. Kristus man inaned Tubun ak, agod idsad mi a.

³ Anut idsad Tamad agod Tubun ak Jesus Kristus, inaned ilo panek agod ilo maror da ka dupanan a.

Pol Korint adi niñedi wo Anut ilo uyan ru ipani a

⁴ Ñai an niñemi wo nal fidian Anut ilo uyan nupani da, fun dugo, Jesus Kristus log Anut ilon ipanan a. ⁵ Kristus lo man Anut in dal fidian lo binawek funfun an ipanan a, an lo binawek ru afulale san, agod binawek manau amam da yak san dam aburoug binawek uraru an an ilom lo inane fute ya. ⁶ Man dugo, ru a man Kristus niñen o an lulanam lo mufulale se yan nuñon igane dugo ale ya. ⁷ Fun an niñen o idsad Tubun ak Jesus Kristus, fon kuai isi da wan niñen o an malam agane dugo, Urgun binawek ipanad dan lo ta katuk am da, tia geig a. ⁸ In an dabai ipanan pe atur sakar yaup saen wadan idu wa, an lo idsad Tubun ak Jesus Kristus san nal idu wan lo in an mel ta niñen o ru ta ipanan na wa. ⁹ Anut pempem inanen ru

iganuri da. In an igian go inanen Nanun, Jesus Kristus idsad Tubun ak da atumanig nug turan igo won ator da. Amaiak ninen o in dugo ibol dan ate mi ago igane wa.

Korint midaen ilon lo biatitek yen da

¹⁰ Nai teig taog, idsad Tubun en Jesus Kristus yan an lo nusumianan da, an fidian mi ilom kisaek dop an lulum lo biatitek ta yen na wa. Nai ilog ibol dak, an fidian mi ilom atumani, agod ananem ilo sou dam kisaek a. ¹¹ Man dugo, Kloe san tamolpein naisag na dupalug, an lulum lo nug paek kagin yen dan dubol go nalon a. ¹² Nai ago nabol an san fun man igo ya. An lulum lo ta ibol, "nai Pol san," ta ibol, "nai Apolos san," ta ibol, "nai Sifas san," agog ta ibol, "nai Kristus san."

¹³ Ak dugo, Kristus tinin gilefutek go sensen dien di? Tia, nai Pol, an ninemi wo aigim fo namat i? Tia, nai yanag lo suguek dupanan i? ¹⁴ Nai Anut ilo uyan nupani da, man dugo, nai tamolpein tata nufulanai man tia ya, nek Krispas in Gaias da mi a. ¹⁵ An lo man talpein ta nai yanag lo nusugui ak ago ibol san tia ya. ¹⁶ Rumok, nai Stefanas san warou inanen ab lo dumado dan nusuguai a, ak gug an patun fo taidam nusuguai ak ago ilog isou man tia ya. ¹⁷ Man dugo, nai tamolpein nusuguai o Kristus idinag go ta nupalu na ya. Tia, in nai bilalun uyan ak nabol ilasa wo idinag go nupalu ya. Agod ru a nabol ilasa na yan tamol sad kankan milaen ak lo ta ilasa na ya, agod kududod lo ru bulbal ak nai dida ta mininen na ya. Ata wo? Ru a Kristus san aigim ninen o tabol ilasa dan man dawai anda

ya, kabelan ru sen ak nabol ilasa dan lo aigim san dabai an nuñon igane ilasa san tia banau.

Kristus in man Anut san dabai agod kankan milae na

¹⁸ Man dugo, tamolpein ensauta a dideg diau dan in ilod lo man, aigim san ninen an ru nino igo won a. Ak man tamolpein ensauta a Anut patud ipasi wo urat igane dan, insad ilo sou lo man, aigim san ninen an Anut san dabai mok. Agod id man nek tamolpein ama ya. ¹⁹ Ata wo? Awak aban ta Anut san buk lo yak igo ibol,

“Nai tamol a sad kankan milae an inaned manau daon nupani wa,
agod kaman tamol adi sad kankan uyanan an nai sen gigin na nigan wa.”

²⁰ Tamol kankan milae ak dugon te imado di? Kubiaen tamol dugon te imado di? Tan en san kaman tamol ru uyan ak ininen dan dugon te imado dak i? Tamol naok amaiak in ka dubunawad ak i? An fidian tia ya, man dugo, Anut in tan en san tamolpein inaned kankan milmilae an, ru burau ak igo won iganeg ilasa ya. ²¹ Man dugo, Anut insinan kankan milae an lo inanen ilo girek igo ya. Tan en san tamolpein insiganed kankan milmilae an lo Anut dulon san tia ya. Tia, Anut ilon igo ibol dak man, ru burau a man mabol ilasa na yan lo mi, tamolpein ensauta a ru an ilod lo rumok an, patud ipasi a. ²² Juda adi kulob girager dile wo ilod ibol da, agod Juda tia yak adi man, kankan milae ak aban an diabi da. ²³ Ak gug ru e man mufulale den man, Kristus aigim fo imat ak san ru. Ru en Juda adi ilod lo rumok san dal ifutani

da, agod Juda tia yak adi ilod lo man, ru an ru burau ago dubol da. ²⁴ Ak man tamolpein ensauta a Anut igiai an, gidad in Juda adi, tia, in Juda tia yak adi, in dulong ak, Kristus man Anut san dabai, agod kankan milaen ak dam Anut san mi a. ²⁵ Man dugo, Anut san ilo sou burau man, tamolpein sad kankan milaen an irinani a. Agod mel dabai an tia yak Anut igane dan, tamol sad dabai irinani a.

²⁶ Teig taog, an sam wagin Anut ipanan an ninen o ilom isou. Tan en san tamolpein malad lo man, an lulunam lo manau tutubu amad da yan wei an tia ya. Tamol tutubu yak dilasag dumado dan dam wei an tia ya. Agod tamol yanad an da yak sad gugoi lo in nunod wei an tia dilasa ya. ²⁷ Ak gug Anut tamolpein a aenta sad leil lo ninen o dubol dan ipilianaig, ate talpein a kankan milmilae an miai ipidinai a. Nek ago mi, in tamolpein dabai ad tia yak ipilianaig, ate tamolpein dabai ad da yan miai ipidinai a. ²⁸ Taida mi, melmel a tan en lo yanad tia yan, melmel a tamolpein patud dupidinai dak, agod melmel nek a ta dien na dan dam ipilianaig, an lo melmel a in dien mok dan mel kawan ak igo won idiraig dilasa ya. ²⁹ An lo man, talpein ta Anut naon na sen yan yan yabisa san tia ya. ³⁰ Anut in sen mi, an anem madok Jesus Kristus lo yan san fun mok a. Anut lou wei mi Kristus ipanig ate id ibinawad a. Kristus lo mi id kankan milaen ak amad da tilasag tumado da. Tamol a id idad go injiliad an man Kristus mi a. In lo yak ninen o Anut malan lo id itaot, agod gun tilasag tumado da. ³¹ Fun an ninen o ru ta digire yan ago ibol da, “Talpein enti kagin ta ninen o sen yan yan yabisa wo igane tap, gidad imoip, in Anut mi yan yan yabisa

wa.”

2

Pol Kristus niŋen o mi ibol ilasa ya

¹ Teig taog, saen ŋai aŋsam na ŋupalug Anut san ru ŋufulale panan man, ŋai kudodom lo ru bulbal ak lo ta ŋiŋiŋen na ya, agod ru kankan milaen ak lo ilasa na yan lo ilom ta ŋiŋane na ya. ² Man fun dugo, ŋai ilo sou igo ŋigane ya, saen ŋai luluŋam lo ŋumado man, ŋai ru an fidian patug fo ŋigane ya. Ru Kristus niŋen o, agod iŋsen aigim fo imat an dam, ru nek an mi ŋabol dugo alon a. ³ ŋai aŋ luluŋam lo ŋumado dugo tinig dabai an tia ya. An mi tia, ŋai ŋarer dugo tubun mi ŋusuruwor se yan dam ale ya. ⁴ Taida mi, ŋaisag ru agod bilaluŋ ŋabol panan an man, ilom ŋiŋane san kankan milaen ak ate ta ŋabol go alon na ya. Tia, aŋsem ale alon ak, ŋaisag ŋiŋen an Awan Urgan san dabai lo ilasa ya, man dugo, Awan Urgan iŋanen dabai kuai tem ikubiaig ale ya. ⁵ ŋai ago ŋigane yan fun man, aŋanem ilo rumok san fun mok an tamol adi sad kankan milaen ak lo ta yen na wa. Tia, ilo rumok an Anut san dabai lo mi yen a.

Kankan milaen a Urgan san na ipalu yan san ru

⁶ Ak man tamolpein a Anut niŋen o iŋaned maŋau milaen an luluŋad lo man, rumok, ru a miŋiŋen dan kankan milaen ak lo ilasa da, amaiak dile duloŋ da. Ak gug kankan an man, saen e gamu tumado den san kankan milaen ak tia geig a, agod tan en san gurman adi sad kankan milaen ak, an dam tia ya. Man dugo, Anut iŋ gurman adi saen gamu tumado den san igane itout o urat igane da.

⁷ Ak man kankan milaen a man kuai te migane ilasa dan man, gubak mi mianuk lo yen na ya. Kankan milaen an Anut wagam mok, saen tan en gamugo ilasa yan, inşinan ilo sou lo imiani a, agog saen milaen mok ante yen na ya. Man dugo, Anut fun lo mok tan gamugo ilasa dugo ilon igo yen a, mitep kankan milaen an id ipanad dop lo girager amad da tilasap tumado wa. ⁸ Kankan milaen naon en man tan en san gurman adi duloŋ san tia ya. In kankan milaen an duloŋ mok tap, kumaen panu san Tubun ak a girager anda yan, aigim fo ta dubali na wa. ⁹ Ak man ru ta gubak mi digire yan igo ibol a,

“Melmel a tamol malad nam ta dile na yan,
kududod ta ilon na yan,

kitek ilo girek aman ta digane na yan,

melmel an Anut ikubune lag dien da, an lo
dop tamolpein a in niŋen o dumat dan ipid-
inai a.”

¹⁰ Ak man melmel nek an Anut inşen Awan Urgan lo kuai te idirig tile ya.

Awan Urgan in mel fidian ikubiani da, an lo inşad bunun mok ilon uyanan a. In Anut san ilo girek nek a ilon lo kuror geig dien dan dam ikubiani fufei da. ¹¹ Ak dugo, tamolpein luluŋad lo enti in talpein ta san ilo sou mok ka ilon ak i? Tia, talpein an inşinan ur mi a. Nek ago mi, talpein ta Anut san kankan ilon san tia ya, tia, Anut sinan Ur mi inşan kankan ka ilon a. ¹² Aria, ur ta tan en san id ta tiŋane na ya, tia, Ur a Anut san na ipalu yan mi id tiŋane ya. Anut Ur an ipanad a, an lo dop id ka binawek funfun a in kawan ipanad amaiak talon uyanan a. ¹³ Binawek wei mi amaiak niŋen o man

gamu miñiñeñ da. Ru a tamol sad kankan milaen ak ipiteñanama dan lo mañ ta miñiñeñ na da. Tia, ru a Awan Urgan ipiteñanama dan lo mi miñiñeñ da. An lo mañau nuñon a Anut kuai te igane ilasa panama yan, mañ ru Urgan ipanama yan nam san fun mok mufulale da. ¹⁴ Talpein a Urgan ilon lo tia yan, mañau nuñon a Anut san Ur san na ipalu dan ta inane na da, man dugo, in ilon lo mañau an ru burau igo won ak ibol da. An lo man mañau nuñon an ilon san tia ya. Man ata wo? Mañau an san fun mok niñen o ilon itarpasi san dabi man, Awan Urgan lo mi ilasa da. ¹⁵ Ak man talpein enti in Anut san Urgan aman da yan, in melmel fidian ikubianip, an lo inaned fudi mok dam ka ilon uyanan a. Ak gug tamol sen ta Urgan ilon lo tia yan, talpein naok an ikubiani san ta idaisuda na ya. ¹⁶ Man dugo, profet Aisaia ago ibol, “Ak dugo, enti Anut ilon ilon pe
an lo in ka mañau ipiteñani wak i?”
Ak gug id Kristus anen mañau amad da ya, an niñen o nek ibol Kristus ilon isou dak igo won id dam ago ilod isou da.

3

Biatitek midaeñ ilod lo yan san ru

¹ Teig taog, saen ñai malmalan anñsam na ñupalu yan, tamolpein Urgan san ak igo an da tiñiñeñ san tia ya. Tia, an tan en san tamolpein igo won, nek ago mi ñai an da tiñiñeñ se ya. Man dugo, gidad an Kristus lo amado bo man, an nek ibol nanuk adi a inaned tinadi gamu geig didiraisi ak igo won a. ² Fun an lo ñai gubak mi su mi ñupanañ aluk

se ya, anañ dabai ak ta nupananj na ya. Ata wo, anañ dabai ak ani san saen gamugo ilasa da. Agod naji njilianj ak man anjanem saen gamugo da. ³ Anjanem kagin ta abileksa na da, tia, anañ tan en san tamolpein dida sam kagin naon kisaek a. Man dugo, anañ luluñam lo turak susak kagin, agod nug paek kagin yen da. Kagin naok ago yan man tan en san mi a. Amaiak ninjen o anañ tan en san tamolpein sad kagin naok an mi agane da. ⁴ Man dugo, saen tamol ta anañ luluñam lo ibol, “Njai Pol san,” ago dop ta ibol, “Njai Apolos san,” an lo manjsama leil lo man anañ nek ibol tan en san tamolpein atutuñanai onj da.

⁵ Anañ dugo ilom isou di? Apolos inj yanaj anda yak i? Tia, naji Pol yanaj anda yak i? Man Anut san urat tamol mi a. Inj man anen anen manjanema urat ipanama ya, agod urat a migane yan lo anañ Kristus o ilom rumok a. ⁶ Njai ai patun nupae dugo Apolos you ipani da, ago gug Anut injsen mi kaginan igane dugo isag tubun a. ⁷ Amaiak ninjen o talpein enti ai patun ipae dan yanjan tia ya, agod talpein enti ai patun you ipani dan, inj dam yanjan tia ya, ago gug talpein enti a ai patun kagin an iganeg isa dan, nek inj mi yanjan an da ya, agod an nek Anut mi a. ⁸ Tamol ai patun ipae dan, inj tamol ai patun you ipani dan da, ilod kisaek a. An ninjen o urat dugo dugo inj anen anen digane yan, atem Anut urat an naon ipidinai a. ⁹ Man dugo, man man Anut san urat kisaek. Anañ man Anut san abi, agod anañ man injsan ab.

Midaen san urat tamol inj ab bek igo wonj a

¹⁰ Ilo panek e Anut naji ipanag en lo man, naji nek ibol ab bek tamol ikawil amag ak igo wonj

bag ngunaig dutur da. Agog tamol sen ak bag an fufo ab yabi da. Ak man ab bek tamol anek anek dugo woŋ ab a diabi dan ninen o in gidad kagin digane uyan a. ¹¹ Man dugo, talpein ta bag tamol sen ta iguni san tia ya. Tia, bag tamol ŋai nguni lag itur da. Bag tamol an man Jesus Kristus mi a. ¹² Talpein ta bag an fufo na gol nam, tia, silva nam, tia, pat naon lak na geig ak nam, tia, ai nam, tia, gafurfur igosan nam, tia, ai roun nam ate ab yabi tap, ¹³ urat dugo man igane yan san bunun mok kuai isi wa. Man dugo, nal a ate Jesus imul ipalu wan ilasa wa, an lo dop urat naok dugo yak talpein an igane yan lilaman lo ilasa wa. Urat an san bunun mok an yai lo walal te ilasa wa. Yai an tamol anen anen sad urat ibitinae a, an uyan boi, tia, saian boi, kuai te ilasa dop tile wa. ¹⁴ Aria, talpein enti inanen ab isuse yan yai an lo itur sakar tap, Anut talpein an inanen urat naon itaot mok an ipani wa. ¹⁵ Ak gug talpein ta inanen ab yai lo inani yau tap, inanen urat igane yan naon ta inane na wa. Ago bo man, talpein an inŋsen ta ideg na wa, tia geig a. Man dugo, Anut patun ipasi wa, nek ibol tamol ta tamol sen ak yai lo ideg o dan yabip yai lo ipasi wak igo woŋ a.

An man Anut san ubou ab

¹⁶ An ananem tinim man Anut san tempel, agod inanen Ur ilom lo imado dan, an ta alon na yak i? ¹⁷ Talpein ta Anut san tempel malan isue tap, Anut talpein an malan isue wa. Man dugo, ab Anut lo imado dan man gun geig a, agod ab an nek ansem mi a.

An tamol niŋedi wo se pitiano i kagin agane amoi

¹⁸ Anj sem ta irawanj na wa. Anj luluŋam lo tamol ta, tan en san tamolpein dugo woŋ ilod isou dak iri panim, inj kankan milaen ak aman da ago ilon isou tap, inj gidad injanen ilo sou ibilisa wa. Inj tan en san tamolpein sad leil lo tamol burau ak igo woŋ ilasa wa. An lo dop inj kankan milaen ak aman da ilasap imado wa. ¹⁹ Man dugo, Anut san leil lo man, tan en san tamolpein sad kankan milaen an njeo igo woŋ a. Ru ta Anut san buk lo njasag njenej ibalsinjani da, ru an igo ibol, “Tamolpein insiganed rawek kagin lo mi diau disasaug Anut ibiai a.” ²⁰ Agod fon Anut san girek ibol, “Tubun en ilonj da, tamolpein kankan milaen ak amad da yan sad ilo sou man, ilo sou kawan a.” ²¹ Fun an njenej o anj fon tamol adi njenedi wo se pitianoj kagin ta agane na wa. Tia geig a. Mel fidian man anjsami la ya. ²² An njenej o man, Pol, Apolos agod Pita, inj dam nek anjsami a. Tan en, tia, kumaen inj matenj da, an dam anjsami a. Ago mi saen e lo gamu tumado den, agod saen a murnap ilasa wan dam anjsami a. Rumok nuŋon, mel nek en fidian anjsam mi a. ²³ An lo ansem man Kristus san, agod Kristus dam Anut san.

4

Kristus san aposel adi

¹ Amaiak njenej o anj manj igo aliaman wa. Manj Kristus san urat tamol mi a, agod ru a gubak mi an Anut ilon lo imianuk a, gug gamu kuai te ilasa amaiak tamolpein murupidai dulonj san urat manj banima lo iganeg, kaginan migane da. ² Aria, anj alonj ak, saen urat taman ta injanen urat tamol adi urat amaiak banid lo igane man, urat tamol an

urat taman san leil lo urat an niŋen o ta diyalis na wa, tia, iŋ urat an kagin dupani uyanan a. ³ An ŋaisag urat apipi ale tap, ŋai ilog ta weiwei na wa. Agod tan en san tamolpein iŋaned kot lo diginiag pe dibitiniag tap, an dam mel kawan a, agod an lo ŋai ilog ta weiwei na da. Rumok, ŋai dam seg ta ibitiniag na da. ⁴ ŋaisag urat walal te ya, agod urat ŋigane yan niŋen o ŋaineg kankan muruan ta ipanag na da. Ago bo man ŋai muruan amag tia yak ago ka ŋabol san tia ya. Tia, Tubun en mi ŋaineg urat ibitinaep ile wa. ⁵ Amaiak niŋen o, saen gamugo dop an imug mel ta bitinaek lo ta agane na wa. Tia, Tubun en imul ipalu san saen ilasa wan niŋen o atitiani gup a. Iŋ melmel a gamu mianuk lo dien dugo tidom tubun ituanai dan, iŋanep idiraip kuai te ilalan lo dilasa wa, agod tamolpein sad ilo sou sed ilod lo dimianig yen dan dam iŋanep walal te igane wa. Saen an lo man, Anut mi tamol fidian anen anen iŋsad urat dugo digane na yak atem ipitianai a.

⁶ ŋai teig taog, ŋai melmel e niŋen o ru niŋiŋen den lo ŋai Apolos da mitilaen igo won aliama wa. An lo man ŋai Apolos da sama bunuma ale dan lo maŋau aŋanep an lo, ru e tamolpein dubol den san fun mok alon a. “Gidad ru dugo digire yan amaiak an ta abi-riŋani na wa.” An ago agane tap, aria, an urat tamol ta yaŋan abisa wak gug urat tamol sen ak ta yaŋan abi idu wo ago agane dan amoi. ⁷ Man dugo, on tamol, on pein, en ata wo on talpein sen ak riŋani dak ago ilo isou di? Ata mel mok e gamu on tuo lo yen den, emaiak on gubak mi lou panek igo won ta ŋane na yak i? Aria, on mel an lou panek igo won ŋane tap, ata wo on se ipitiano da, nek ibol

onʒigane dabai nam ʒane yak igo woŋ i?

⁸ Nag aŋ Korint tamolpein, aŋ mel fidian aŋal go idaisuda la yak boi! Nag binawek funfun a Urgan ipanaŋ dan ilom iŋanefute la yak boi! Aŋ kiŋ adi igo woŋ alasa la ya, agod an man maŋsama binawek lo tia yak boi! ʒai ilog ibol dak aŋ kiŋ adi igo woŋ alasa yan rumok a. Man dugo, an lo dop maŋ aŋ da sisem kiŋ adi igo woŋ ka tumado wa. ⁹ Ata wo ʒai ago ʒabol ak i? ʒaisag leil lo man, maŋ aposel adi nek ibol yu tamol a gugurut nam materŋ dile san kob diŋane yak ago mi mumado da. Aŋ aloŋ ak tamol iŋ yu digane itout pe dumul dop, iŋsad ager diŋal pe patud na dirau on dida diau dop lo tamolpein dal awan ananaem dutur dan ka dil a. Agop wagai lo nug dufuni san aben ante dilasap iŋsed nug dufuni dop dumat a. Ru mitilaen an maŋ aposel dam tou amam yabi da. Maŋ nek mel ta senamo geig ak walal isip, an lo melmel fidian diliama san ago milasa ya, eŋel sad leil lo, agod tamol malad lo dam mi a. ¹⁰ Maŋ aposel adi Kristus wagen lo burau tamol milasag mumado da, ak gug aŋsem mi Kristus lo amado dugo kankan milaen am da ya! Maŋ tamol dabai am tia yak, gug aŋ man dabai tinami a! Aŋ yaŋam diabisa da, ago gug maŋ yaŋama diabi idu da! ¹¹ Maŋsama madok fun lo mumadog ipalug gamu mumado den man igo ya. Maŋ anaŋ o mamat dak, you o dam mamat da, agod maŋsama biouŋ dam imasisire yau a. Maŋ panu panu mator dugo saian dupanamag tinima dam dusue ditare na ya, agod aben ta ate yaes mabal san sasau ta yen man tia ya. ¹² Maŋsema banima nam urat wagai migane da. Saen tamolpein dumisilanama dan, maŋ bar

uyan ak mi mupidinai se ya. Saen muruan du-panama dan, muruan an misinip matur sakar se ya. ¹³ Saen maŋ niŋema wo uf digane dan, maŋ ilo panek ru lo mi ru naon murupidai da. Maŋ nek ibol tan en san nun samuk samuk igo ya, tia, ibol sas bod tinin te isuda yak igo ya. Tan en san tamolpein malad lo maŋ gubak mi ago mumado se ya, agod gamu man inŋsad ilo sou kisaek mi a.

¹⁴ Nai ru en ago ŋigire an lo aŋ miai ŋupanaŋ o tia, tia, nai kududom ŋabi dugo ru kagin ŋupanaŋ da, nek ibol aŋ ŋaineg nanug muroug adi igo woŋ a. ¹⁵ Gidad aŋ Kristus lo yan titianek tamol wei mi امام da ya, ago bo man, aŋ tamam wei an tia ya. Man dugo, ru uyanan a ŋurupaian go alon an lo man, nai ananem tamam Kristus lo yak igo ŋilasag ŋumado da. ¹⁶ Fun an niŋen o aŋ ŋududuwan da, ago dop aŋ nai atutuŋanag pe, anŋsam tutuŋanek tamol igo woŋ asodudunag ŋilasa wa. Naisag kagin naok naok an anek anek atem agam agane wa. ¹⁷ An niŋen o Timoti ŋidinig anŋsam na ipalu da, Kristus lo in ŋaisag nanug igo woŋ niŋen o ŋamat da. In Tubun en san urat niŋen o ilon dabai mok a. In ka ibinawan dop, imug nai luluŋam lo ŋumado dugo, kagin naok naok a Kristus lo ŋigane na yan ilom isou da wa. Kagin a ŋigane na yan, in ru a aben fidian sad Kris midaen kisaek kisaek atem ŋupiteŋanai na yan da, naon kisaek mi a.

¹⁸ An aenta man sem isodudunan alasa dugo ru kawan tubun mi aninŋen da, man dugo, aŋ ilom lo nai anŋsam na ta ŋupalu na wak ago abol da. ¹⁹ Ak gug Tubun en ilon ago yen tap, nai gugurut nam anŋsam na ŋupalu wa. Saen an lo, talpein a niŋen tutubun mi digane dan ŋukubianai ŋeil a. An mi tia,

injsad dabai mok Anut san na diñane boi an dam ñile wa. ²⁰ Man dugo Anut san kagin panek ilon lo man, ñineñ tutubu yan in mel malan te yak tia ya, tia, mel malan te man Anut san dabai, tamol tinin lo mi yen da. ²¹ Dal dugon lo ñai anñsam na ñupalu wo an ilom ibol di? Ak dugo, bu ñiñanep da ñupalu wak i? Tia, ñai ñupalup ilo panek kagin, agod mos kagin dam ñukubiaip ale wo ilom abol di?

5

Teim a jeit igane dan anñsam midaeñ lo akudi

¹ An luluñam lo aenta ru disinig ñaisag na dupalug igo durupaiag, jeit kagin naok saian geig ak yen da. Agod gob adi luluñad lo jeit kagin naok igo yak ta yen man tia ya. Ru ñabol den fun igo ya, an luluñam lo tamol ta in inñinan taman san iwon foun amaiak inañeg ida dien da. ² An an alon bo man, an sem ipitianañ da! Gidad an ilom tubun mi ipapaop amado wa. Ago dop tamol a kagin ago igane dan akudip midaeñ patun fo agane ilasap imado wa. ³ Gidad ñai an siñirem na tia yak gug ñaisag ur an da amado da. Agod ñai tamol a kagin ago yak igane yan ñukubiani la ya, nek ibol ñai an da tumado dak igo won a. ⁴ Nai ru kagin igo ñupanañ da. Saen an Tubun ak Jesus yañan lo apalu atumani dop ñai ñaineg ur lo an da tumado dop, agod Tubun ak Jesus san dabai an an luluñam lo imado man, ⁵ tamol an Satan tuon lo aganep an lo inañen tinin aupasek anda yak pitiñinek inane wa. Ago dop an lo Tubun en imul ipalu san nal lo tamol an san ur patun ipasi wa.

An aup aupasek adi ta aganurai na wa

⁶ An sesunoi kagin agane dan man ta uyan na ya. Yis kabelan in flawa tubun ak da you da atumanip yis an ifurak yau san urat yaup iganep anan an fidian ikafut a, dugo, an ta alon na i? ⁷ An ninen o an gidad yis wagam ak abal yau a, an lo dop an nek ibol anan yis aman tia yak igo won alasa wa. An nek ibol anan naok ago yak igo won an rumok a. Man dugo, Kristus man Anut yai digane pani an lo imat la ya, in sen mi idsad Pasova san sipsip nanun id tani san mi a. ⁸ Amaiak ninen o Pasova san soubul id kagin tupani wa. Ak man id yis wagam ak ta tani na wa, tia, yis an man ru mitilaen igo won a, an siai kagin agod kagin saian geig ak dam mi a. Id soubul an san anan yis aman tia yan tani wa, anan an man, ru a ilon lo rawek ta yen na dan, agod kagin a idsad ilo rumok igane ilasa dan mi a.

⁹ Naisag girek imug en lo nai an igo nurupaian da. An tamolpein jeit kagin tinadi ak sinired na ta amado ator na wa. ¹⁰ Nai tamolpein tan en lo sad madok saian ak ninedi wo ta nabol na da. Tia, nai tamolpein naok igo amaiak ninedi wo ilog isou da: tamolpein jeit kagin digane dak, a aenta sad melmel ninedi wo inaned kankan mala sek mi awan isa dak, a tamol gol ak dufup sad melmel digam dak, agod a tubud sewak yanad lo ubou dile da. An tamolpein naok ago yak abisawaip asau mi aup amado tap, an tan en abisei pasik a. ¹¹ Nai gamu girek ngire en lo dugo ilog isou dan kuai tem nabol o da. Tamol ta in igo ibol, in ilo rumok tamol, ago gug in jeit san kagin igane da, tia dop, in tamol malan sakar tinan, tia dop, in tamol tubud sewak ninedi wo ubou ile dan, tia dop, in lukluk

san tamol, tia dop, in gumagam san, an tamol naok ago yak ta aganuri na wak, agod dida amasip anan ta ani na wa.

¹²⁻¹³ An dugo ilom isou di? Naisag urat en lo tamolpein a Kris midaen patun fo dumado dan kibianek lo ndirai ak i? Tia geig a. Anut mi tamolpein naok an ikubianaip yil a. Ak man an Kris midaen, an sam urat man tamolpein an siganem midaen ilon lo an mi akubianaip eil a. An Anut san girek ibol ago agane, “Tamol an luluam lo igane saian dan, akudip yau a.”

6

Tein inanen tein kot lo igane yan ninen Pol ipidai da

¹ Kagin e an luluam lo yen den uyan tia ya. Saen an sam midaen ilon lo talpein ta mel ta ninen o inanen turan ile saian dan, inaneg ida diaug midaen naod na muruan an ta dukubune na ya. Tia, in turan an inaneg kot lo yaug gob adi banid lo iganeg kot dupani a. Kagin naok an saian geig a. ² Id gun adi man, murnap tan en san tamolpein bitinaek lo tidirai a, an ta alon na i? An tan en san tamolpein akubianaip eil a. Fun an ninen o, enta wo an luluam lo mel tusan ak akubianip nek muruan an akubune san, an ta idaisuda na yak i? ³ Id enel adi dam bitinaek lo tidirai an an ta alon na i? An ninen o sapta taida dop id Kris idsad manau idaisuda wa, an lo idsad muruan tan en san man gamu ka tukubune wak i? ⁴ An ninen o nai igo nurupaian, gidad tamol midaen ilon lo yanad tia yak, an sam muruan tan en san ka bitinaek lo diganep dukubune wa. ⁵ Nai ago nabol an lo miai

ka nupanan a. Ak dugo, an lulunam lo tamol ta inanen kankan milaen ak idaisuda yan alep, lo in muruan a dugo ilasa dan ka ikubune san tia, an rumok ak i? ⁶ Tamol naok ago yan anane amoi a, tia, an sam kagin igo ya. Tein Kris ak ta inanen tein inaneg yang kot lo igane da. An mi tia, ilod lo ta rumok na yan naod na an ago agane da!

⁷ An lulunam lo tein ta inanen tein kot lo igane dan ninen o, kagin en kuai tem ikubiai ale da, Satan an ibian adu geig a. Dugo, on umoi dop onane tei muruan ipano tap, an saian ak i? Dugo, on ule funip onane tei onsa melmel igam o irawo tap, an saian ak i? ⁸ Ak gug an ago agane man amoi da. Tia, ansem tamolpein aenta arawaig insad melmel agam o agane da, agod dal sen ak lo dam agane saian da. An mi tia, kagin en ananem teim Kris ak lo dam agane da!

⁹ Tamolpein kagin sisaiak digane dan Anut san kagin panek aben lo diladu san tia ya, an ta alon na yak i? Mel en ninen o an sem ta irawan na wa. Tamolpein naok igo man kumaen panu dinane san tia ya: tamolpein jeit digane dan, tubud aenta ubou ad dile dan, a talpein sen ak iwon ida dien dan, tamol in tamol mi nug iwon on digane dan, ¹⁰ tia, gumagam adi, gidiged adi, lukluk tamol adi, a uf digane dan, agod a rawek lo gumagam kagin digane da. Tamolpein fidian a kagin ago digane dan, Anut san kagin panek dinanep paen na dumado san tia geig a. ¹¹ Agod an aenta tamolpein naok ago yak amado se ya. Ak man an suguek ananeg, Anut idiran go tamolpein gun ak alasa ya. Agod idsad Tubun ak Jesus Kristus yan an lo, agod

idsad Anut inanen Ur lo dam, an Anut malan lo man itaotam alasag amado da.

Jeit kagin ninen asol au a

¹² An igo abol da, “Kagin dugon ninen o nmat dan ago ka nigane wa.” An rumok, ak man kagin fidian ta dubunawan na wa. Nai dam ninen ago ka nabol a, mel dugo nigane wo ilog ibol dan ka nigane wa. Ak man nai ninen naok en ta niganuri na wa, man dugo, kagin ta a saian an nai itirnag man namoi a. ¹³ An abol, “Anan man tinaed san, ago dugo tinaed man anan san.” Gug nai nurupaian da, Anut murnap tinaed in anan da sisem daon ipidinai a. Kabelan an jeit kagin an mel tusan nek ibol anan ani dak igo won ilom isou banau. Man dugo, Anut idaned tinid man jeit kagin san, ilon ago ta yen na ya, tia, idaned tinid san biabi man, id Tubun ak san urat tiganeg tumado da. Ago dugo Tubun en idaned tinid kaginad iganeg imado da. ¹⁴ Anut inanen dabai lo Tubun en maten lo ifufunig kumaen imasag imado da. Nek ago mi id dam ifufunad pe kumaed tumasap tumado wa. ¹⁵ An tinimi anen anen man Kristus tinin san boi kisaek kisaek a, an an ta alon na yak i? Ago tap, nai Kristus tinin san boi ta kisaek ninanep jeit pein da nutumani wak i? Man tia geig a! ¹⁶ Tamol a jeit pein da dien dan, inaned tinidi an dutumanig kisaek a, an ta alon na yak i? Man dugo, Anut san ru lo igo ibol, “Tamol in pein da dutumanip tinid kisaek ilasap dumado wa.” ¹⁷ Ak man talpein a Tubun en da dutumani dan, inanen nutun ilon lo man in Tubun en da bubed kisaek ilasag dumado da.

¹⁸ Fun an niñen o jeit kagin amoip asol au a. Ata wo? Aupasek naok aenta fidian a talpein igane dan man talpein an tinin patun fo dien da, an lo aupasek an inanen tinin ta issue na da. Ak man in a jeit igane dan inanen tinin malan issue da. ¹⁹ Anjanem tinimi an man Awan Urgan san aben gun a, an ta aloñ na yak i? Anut inanen Ur iganeg ipalug an ilom lo imado da, an niñen o an tinimi an anjam tia ya. ²⁰ Anut nanun san maten lo idad injilian an naon tubun mok a, an niñen o an tinimi san kagin naok naok atem, Anut yanjan abisap lak na geig asini wa.

7

Nug iwon njanek san pitenjanek ru

¹ Girek njasag na aganeg ipalu yan lo, nai an mel ta lo ru kagin njanen o abol a. Malmalan mok ago abol, tamol in pein ta inane nap kawan imado wa, an uyan ak i? Aria, nai ru naon igo nurupaian da. Rumok, tamol in pein inane wo imoi dop man an uyan a. ² Ak man gamu anjam taun lo jeit kagin ilasag tubun a, an lo tamolpein wei mi kagin an lo diau dudu da. An niñen o gidad tamol in iwon anda wak, agod pein dam in tamol anda wa. ³ Tamol in iwon da sisem dien dan uyan a. Tamol tinin an injan pein ipani wak, nek ago mi pein tinin dam injan tamol ipani wa. ⁴ Man dugo, pein injan tinin injan mi man tia ya, tia, inanen tinin iwon tamol ak san. Nek ago mi tamol dam inanen tinin injan mi tia ya, tia, inanen tinin iwon pein ak san. ⁵ On iwo da aen o ta umoi na wa. Ak man saen on gudanek gane san saen ta piliani tap, an uyan

ak on iwo da awam kisaek gup ago agane wa, ak man an saen katukan mi wa. Aria, saen isuda dop man fon atumani da wa. Man dugo, kabelan onane tini masak itirno dop lo Satan dal gane panip on ilo inanep jeit gane banau. ⁶ On pein nane wak nai ru dabai nam ago ta nrupaio na da. Tia, ak man on ilo man, pein nane wo ibol, nai awok nupano wa. ⁷ Nai iwog tia ya, ago yak ninen o tamolpein ilod lo rumok dan, nai numado dak agom dumado wo namat da. Ak man fidian dal an lo ago dumado dan muruan mok a. Tamol kisaek kisaek, pein kisaek kisaek atem Anut dabai anen anen ipidina da, talpein ta binawek naok ta inane dugo talpein sen ta binawek sen ak dam inane da.

⁸ Aria, an tamolpein a iwom tia yan, agod pein suos adi dam, sam na ru kagin en nrupaian da. An nek nai igo kawan amado dop man, an uyanan a. ⁹ Ak man in siganed ilodi ka ditirni san ta idaisuda na dop, gidad iwodi dusu wa. Kabelan in tinid tubun mok imasa banau.

¹⁰ An tamolpein iwom da yan ru kagin en nrupaian da. (Ru kagin en naisag tia ya, tia, Tubun en ru en o wagam mi ibol ilasa la ya.) Pein ta iwon tamol ak ta mok ibisei na wa. ¹¹ Ak man pein an iwon tamol ak ibisei tap man, in kawan imado yau a. Tia dop, fon imul yaup iwon tamol ak da dumado da wa. Ru kagin taidam igo nrupaian da, tamol dam iwon pein ak ta mok ibisei na wa.

¹² Aria, nai an aenta ru kagin igo nrupaian da. (Tubun en igo ta ibol na ya, an ninen o naiseg igo nrupaian da.) Tamol Kris ak ta inanen iwon ilon rumok an tia, gug in tamol da dumado wo ilon ibol tap, gidad pein an gob imado da, tamol an

pein ta ibisei na wa. ¹³ Nek ago mi pein Kris ak ta tamol gob ak da dumado da, agog in pein da sisem dumado wo imat tap, pein an tamol ta ibisei na wa. ¹⁴ Man dugo, Anut malan lo pein e ilon lo rumok den gun imado da, agod an inanen iwon tamol ak ilon lo rumok tia yan ituani da, ata wo, tamol an inanen iwon pein ak ilo rumok anda yan ida dutumani a. Nek ago mi, pein a ilon lo rumok tia yan, inanen iwon tamol ak san ilo rumok an lo man, gun ilasag imado da. Ak kagin en igo tia tap, an pein tamol naom ago yan ananem nanuk adi in gob sad nanuk adi igo won dumado da. Ak man rumok, ananem nanuk adi ikok dumado dugo Anut anen muroun muroun dida dutumanig gun dumado da.

¹⁵ Ak man onane iwo ilon lo rumok tia yan ibisawo tap, gidad ulefunip in ka yau a. Saen kagin naok ago ilasa dan man, on tamol on pein ilo rumok a da yan ta isubano na da. Man dugo, Anut an maror lo mi amado wo igian a. ¹⁶ Ak dugo, on pein onane iwon tamol ak binawip in dam ilo rumok tamol ilasa wak boi, tia wak boi, an ulon ak i? Agod on tamol onane iwon pein ak binawip lo gob sad kagin ibiseip Kristus o ilon rumok ak boi, an ulon ak i?

¹⁷ Ak man gidad, an anen anen madok naon dugo yak a Anut ipilianig ipanan an, ate nek ago amado yau a. Man dugo, Anut an anen anen madok naok anen anen atem anane wo igian la ya. Ru kagin a nai midaen fidian ilod lo ngansi dan man nek an mi a. ¹⁸ Ak dugo, tamol ta saen Anut iwagi dan inanen tinin sunulon dutute la yak tap, an gidad imoip ago ka yen a. Tia, Anut tamol ta

iwagi gug tinin suñulon ta dutute na tap, in tinin suñulon dutute wo isumianai man imoi a. ¹⁹ Tini suñulon tutek an mel kawan a, tini suñulon tutek tia yak dam mel kawan a. On Anut san ru kagin fidian uri pani san man mel malan te ya. ²⁰ Aria, ñai fon ñurupaian da, saen Anut an igian man, an anen anen madok naon dugo yan ate amado dan, an anen anen nek ago amado yau a. ²¹ Saen Anut igian an an bigabeg amado dugo igian i? Ak man gidad, an ninen o ilom weiwei amoi. An Anut dal ikubiai panan dop an tamol bigabeg tia yak igo alasa wak tap, dal an ago ka agane wa. ²² Man dugo, tamol a bigabeg urat iganeg imado dugo Tubun ak iwagi an man, in Tubun en san tamol kawan igo imado itor da. Nek ago mi, tamol a kawan imado itor dugo Kristus iwagi an man, in Kristus san tamol bigabeg urat igane san a. ²³ Anut an idad inilian a, an naon man lak na geig a. An lo an Kristus san mi a, an ninen o kabelan tamol sen ak san bigabeg igo alasa banau. ²⁴ Aria, onane madok kagin naok naok dugo won lo mado utor dugo Anut igio yan, nek ago mi mado utor yau dop, Anut da nug turan igo won ago ka amado ator a.

*Talpein a nug iwon ñanek tia yan ru kagin irup-
idai a*

²⁵ Nai gamu an sam sumianek tamolpein iwod tia yak lo agane dan naon ka ñurupaian a. Tubun en ru kagin en ñurupaian o ta ibol na ya. Tia, en ñaiseg ilog nam ñurupaian da. An ñaisag ru kagin ka anane wa, man dugo, Tubun en in ñai ilon imunanag go manau uyanan ipanag en lo ñubunawan a. ²⁶ Saen gamu lo tumado den muruan wei mi id sinired na

ipalu yan niñen o, ñai ilo sou igo ñigane da, oñ iwo tia mado tap, an uyan a. ²⁷ Oñ iwo ñane la i? Ago tap, kudi dop iwo tia mado wo gane umoi. Tia, oñ iwo tia mado di? Ago tap, oñ iwo ta ñane wo abañ ule umoi. ²⁸ Ak man oñ kawan madop iwo ñane tap, an aupasek tia ya. Agod kubakan ta iwon injane tap, an dam aupasek tia ya. Gug tan en lo tamolpein a iwodi diñane dan muruan wei mi dile wa, an niñen o ñai ilog ibol dak man, muruan naok an an irinjanan a.

²⁹ Teig taog, ñai igo ilog isou da. Tan en san saen katukan mi a. An niñen o gamu agod nal murna san fidian, tamol ensauta a iwod da yan, nek ibol tamol a iwod tiag dumado dak igo woñ, ago dumado wa. ³⁰ A tinañ aru digane dan, nek ibol tamolpein a tinañ aru ta digane na dak igo woñ, ago dumado wa. A ilo uyan lo dumado dan, nek ibol in ilod muruan dak igo woñ ago dumado wa. A mel ta didad diñane dan, nek ibol mel an injsad tia yan niñen o in diabi yau san tia yak igo woñ, ago dumado wa. ³¹ Agod a tan en san melmel urat dupidinai dan, nek ibol tamolpein a tan en san mala bulbal injaned bused ta isubani na dak igo woñ, ago dumado wa. Man ata wo? Tan e gamu tile den fidian itout o sumeik da.

³² Ñai an ilo weiwei amam da amado wo ilog ta ibol na da. Tamol a iwon tia yan in Tubun ak san urat kagin ipani da, agod dal dugon lo in ka Tubun en ilo uyan ipani san niñen o mi ilon isou da. ³³ Ak man tamol iwon anda man, tan en san kagin naon irae da, an niñen o dal dugon lo injanen iwon ilo uyan ipani san niñen o ilon isou da. ³⁴ Fun an niñen o injanen ilo sou lo gilek yen da. Pein ta a

iwon an tia yak ta, tia, kubakan a Tubun ak san urat kagin ipani san saen anda yak ta boi, kob ate yau o ilon ibol dak igo ya, in tinin n̄utun fidian lo in̄anen Tubun ak san ilobol iganuri wo ilon tubun mi yen da. Ak man pein a iwon anda yan in̄anen ilo sou an senamo ya, dal dugon lo in̄anen tamol ka ilo uyan ipani wo yaes ifuni da. ³⁵ N̄ai an̄ n̄subanaŋ o ilog ta yen na da, tia, n̄ubunawaŋ o ru ago n̄rupaian̄ da. N̄ai ilog man, an̄ kagin uyan ak lo amado dop, an̄anem tini ganei Tubun en lo man nek itaot yen a.

³⁶ Aria, tamol enti kubakan ta n̄ien dupani an, gamugo in̄ane dak gug, in̄anen ilo sou lo kagin a kubakan an lo igane dan ta uyan na dugo, kubakan an in̄ tamol in̄ane wak san saen kitekan irin̄ani la ya, ago dugo tamol an ilon lo ikubiani ak man, kubakan an in̄ane wak ago ilon isou tap, aria, ilon dugo ibol dan ago ka igane wa. In̄ au ta ipas na da, uraru an ka nug din̄anep nug iwon dumado wa. ³⁷ Ak man tamol an tamolpein sen ak ta disoduduni na dugo, in̄anen ilo sou dabaig, in̄anen ilo masak dam itirni fufei da, agod kubakan an ta in̄ane na wak gug in̄anen n̄ie panek pein igo won̄ imado yau o ilon ibol tap, an dam uyanan a.

³⁸ Amaiak nin̄en o tamol enti kubakan n̄ien dupani an in̄anen iwon igo in̄ane dan, kagin uyanan igane da. Ak man tamol enti kubakan an iwon igo in̄ane wo imoi dan, in̄ dam kagin nen uyanan ak igane da.

³⁹ Pein a tamol anda yan, Anut san kubiaen̄ isubanig, saen in̄anen tamol gamugo imat dugo, in̄san tamol ibiseip tamol foun ak ta in̄ane na wa. Ak man saen dumado yau nap tamol ak imat tap,

pein an in̄ ilon yen dan ago mi tamol foun ak ka in̄ane wa. Ak man in̄ tamol enti a Kristus san an mi ka in̄ane wa. ⁴⁰ Ago gug n̄ai igo ilog isou da. Pein an imoi kawan imado tap man, nen ilon uyanan a. Taida mi, n̄ai igo ilog isou da, n̄ai dam Anut anen Awan Ur amag da ya, an nin̄en o in̄ n̄ai ulum ag yabi dugo n̄ai ru kagin en n̄urupaian̄ a.

8

Mudan a tubud sewak yai digane pidinai dan san ru

¹ Aria, n̄ai gamu mudan a tamolpein tubud sewak adi yai digane pidinai dan nin̄en o n̄abol alon̄ a. An̄ igo abol da, “Id fidian man̄au amad da ya.” Awo, id fidian talon̄ man ru an ru rumok a. Aria, talpein a man̄au anda yan sen ipitiani wa. Ak man talpein a Anut anen tamolpein nin̄edi wo ilon ipidinai dan, in̄aned ilo rumok dabai ipani wa. ² Tamol a in̄anen man̄au nin̄en o ikawil an ago ibol dan, n̄in̄ej naok an lo mel en kuai tem ilasag yen dugo tile da, in̄anen man̄au gamugo tubun a. An lo man man̄au naok a tamol an yabi wo Anut ilon ibol dan, an in̄ ilon lo man katukan go ago yen da. ³ Ak man tamol a Anut ilon ipani dan, in̄ tamol an ilon fufei da.

⁴ An̄ gubak mi mudan a tubud sewak sad ai pat mitilaedi yai digane pidinai an ka ani san nin̄en o asumianag a, aria, gamu ru naon n̄urupaian̄ da. Rumok, id fidian talon̄ uyan ak, tubud ai pat mitilaedi man tan en lo mel nun̄on an tia ya. Taida mi id talon̄ ak, Anut kisaek o lian in̄ mi rumok imado da. ⁵ Mel wei mi a tamolpein “tubud” dubol dan, tan na boi, tia keit lo boi dumado dak ago

tan en san tamolpein ilod lo rumok da. (Rumok, tamolpein mel wei mi “tubud” dubol da, ago dugo in mel wei mi dam “tubun ak” dubol dak ago talon a.) ⁶ Ak man gidad, id Kris adi talon man, Anut mok imado dan in kisaek o lian a. In mi id Tamad, in mi mel fidian idiri a, agod id ilo uyan tupani wo kumaed dumado da. Taida mi, idsad Tubun ak kisaek mi a, an man Jesus Kristus. Inanen tuon lo mel fidian dilasag dumado da, inanen dabai lo dam id tumado yau da.

⁷ Ak man manau naok e ninen o nabol den, Kris fidian ilod lo ta yen na da. Man dugo, Kris aenta ilod isou yau dak man, tubud ai pat mitilaedi in mel rumok ak mi a, ata wo, gubak mi in gob adi sad tamol kagin diri se ya. Amaiak ninen o saen mudan a tubud sewak ai pat mitilaedi yai digane pidinai an diani man, “mudan en tubud aenta san,” ago ilod isou da. Ilod itarpasi man tia ya, an lo inaned kankan ilon lo kagin uyan ak, kagin saian ak dibiatai o muruan geig a, an ninen o inaned kankan nun anda ilasag yen dan ago dukubiani da. ⁸ Ak man anan dugon tani dan ninen o Anut ta ipitianad na wa. Id ta tani na tap, mel uyan ak ta irinanad man tia ya, nek ago mi, id tani tap, mel uyan ak taidam tinane san tia ya.

⁹ An ansem pilianek agane san idaisuda ya, ak man kagin agane wa, kabelan pilianek agane dan, tamol a ilod itarpasi an tia yan sad ilo rumok an apitinini banau. ¹⁰ Ak dugo, talpein ta ilon ta itarpasi na yan, on a manau lak na geig ama da yan, tubud ai pat mitilaedi san tempel ilon lo masig mudan wani dugo ilio yak man, in dugo ilon isou wak i? Kagin e on gane den lo talpein an ilon

yabisap, an lo inj dam mudan a tubud sewak yai digane dupani dan yani wa. ¹¹ Agop onjane tei e ilon ta itarpasi na yan, onjane manjau lak na geig ak lo onj tei an pitinjini da, ak man Kristus talpein nek emaiak dam ibinawi wo imat a. ¹² Dal an lo onjane tei ilon ta itarpasi na yan san kankan malan sue da. Saen onj muruan naok e pani den, aupasek gane da, agod Kristus lo dam aupasek gane da. ¹³ An ninjen o ananj ta e njani den teig iganep aupasek lo yau idu tap, gidad an mudan boi, tia, ananj sen ak boi, njai ananj naok an njani njamoi a. Man dugo, njai ilog igo yen da, kagin e njigane den lo talpein sen ak ta yau idu na wa.

9

Binawek naok dugo aposel adi dijnane san inj idaisudaya

¹ Ak dugo, njai seg ilog nam njator san tia i? Dugo, njai aposel tia yak i? Dugo, njaiseg malag nam idsad Tubun ak Jesus ta njile na yak i? Ak dugo, anj ilo rumok adi njaisag urat wagai Tubun en ninjen o njigane na yan nunjon ansem mi yak, an ta ale na i? ² Anj alonj uyanan ak, mel an fidian rumok a. Gidad tamolpein sen ak sad ilo sou lo njai aposel tia ago dubol da, anj man ago abol san tia geig a. Man dugo, Tubun ak ipilianag go njai aposel ta njilasag njumado yan san kob man, nek ansem mi a.

³ Tamolpein a njai bitinaek lo diginiag o ilod ibol dan, gamu ru naon igo lo seg itargiranag san njurupidai da. ⁴ Manj aposel iloma ibol tap, anj manj pat apanamap ate madad pe mani maluk dop mumado wo malama ka migane wa. Binawek

naok a miñane san mañ idaisuda ya. ⁵ Nek ago mi, mañ iwoma ilod lo rumok an ka mañal pe dadi mator dop urat migane wa. Aposel aenta ago digane da, Pita ago igane dak, agod Jesus sen tein muroun dam ago digane da. Ak dugo, mañ mi ago migane san ta idaisuda na i? ⁶ Tia dugo, ñai Banabas da, nek ibol aposel aenta igo wonñ tia ya, mañsema mi banima nam urat migane wak ago abol di?

⁷ Ak dugo, yu tamol ta inñ wagai san urat igane dan, inñinan moni sen ipani dak i? Ak dugo, enti inñanen abi lo ai patun ipae da, ago gup anañ a yani wan imoi ak i? Ak dugo, enti bilelek kagin ipidinai dan, bilelek an sad su iluk san imoi ak i? ⁸ Ak dugo, dag ru milaen mi e ñabol den, tan en san tamolpein inñaned kankan lo ilasag ñinñeñ dak ago ilom isou dak i? Ak man Moses san kubiaeñ an lo ru naok kisaek ibol da. ⁹ Kubiaeñ an lo ru emaiak e digireg yen da, “Saen makau wit fufo ila iso dop metmet ikak yau o ipartitale dop, onñ makau awan ta wafutani na wa.” Ak dugo, Anut ru an nam makau mi niñen o kagin ipani dak ago ilom isou di? ¹⁰ Dugo, id ibinawad o inñ ru an irupaiad da, an rumok ak i? Awo, inñ id niñed o ilon isou se ya, an lo Moses kankan ipanig inñ kubiaeñ lo ru an igire ya. Fun ata wo Anut ago ilon isou se yak i? Talpein enti anañ ipae dan, agod talpein enti anañ nuñon ituteg inñane dan, inñ sisem anañ naon a murnap diñane san niñen o malad digane da, an mi ka diñane wa. ¹¹ Mañ anñ luluñam lo kumaen panu san ai patun wei mok mupae se ya, an rumok tap, dugo, anñ kulob an naon, tan en san melmel lo abinawama wo malama migane

dan niŋen muruan ifunaŋ di? ¹² Tamol aenta aŋ luluŋam lo iŋsad urat niŋen o naon diŋane san idaisuda tap, binawek naon kisaek miŋane san niŋen maŋ idaisuda geig a! Ru e ŋurupaiaŋ den, rumok i? Tia i? Aŋ akubianip ale wa.

Ak man maŋ gubak mi aŋ binawek naok an apanama wo ta musumianaŋ na ya. Rumok, binawek an apanama san dabai maŋ da ya, gug miŋane man mamoi a. Ata wo? Maŋ iloma man, maŋsema mi muruan fidian misini wa, an lo dop Kristus anen bilaluŋ uyan ak tamolpein murup-idaip dulonŋ san dal ta mufou na wa. ¹³ Tamol ensauta a tempel ilon lo urat digane dan, iŋsad anaŋ man, anaŋ a tamolpein disiniŋ Anut dupani wo tempel lo dupalu dan aenta diŋane da, an ta alonŋ na i? Agod a alta fo mudan dumari idu dan, iŋ mudan an aenta sed niŋedi wo ka disinip diani wa. ¹⁴ Dal nek ago mi, Tubun en ru dabai anda yak nam igo irupaiad a, tamolpein a bilaluŋ uyan ak dufulale dan, iŋaned urat naon man tamolpein a dibinawai dan dupidinai a.

¹⁵ Ak man ŋaineg urat naon ŋiŋane man ŋamoi da. Taida mi, ŋaisag ru e ŋigire yen igo asuti dop an lo ŋaineg urat naon apanag o ta ŋigire na da. Tia, kagin e ŋigane den, emaiak niŋen o ŋai ka seg ipitianag a, an niŋen o talpein ta kagin an ipasi yau o man, ŋai ilog tubun geig imoi da. Man dugo, urat naon ago apanag o tap, gidad ŋai ŋamat gup. ¹⁶ Ak man gidad, ŋai ru Kristus niŋen o yan tamolpein ŋurupidaip dulonŋ gup, ŋai sen ka seg ipitianag san man tia geig a. Ata wo? Jesus sen ŋai ago ŋigane wo irupaiag a. Iŋ awan ŋabi wa, tia tap, muruan tubun geig ŋiŋane wa! ¹⁷ ŋai seg ilog nam iŋanen

ru nabol ilasa dak ago tap, rumok, n̄aisag urat naon n̄aisag na ipalup n̄ijane wa. Gug seg ilog nam urat an ta n̄igane na da. Tia, dugo mok n̄igane dak i? Mala nouk a saen Kristus urat en banig lo igane dugo, tinin ilon lo yen dan mi, nuñon igane wo n̄ai ago n̄igane da. ¹⁸ Ago yan lo n̄aisag urat naon ata mel i? Saen n̄ai Kristus niñen o tamolpein naod na n̄ifulale dan, naon tia kawan n̄upidinaip in̄ ka dulon̄ a, nek an mi a. An lo dop n̄ai ka dabai a lo n̄aisag urat naon n̄ijane wan, sen gigin na n̄iganep ago ka yen a.

Pol man tamolpein fidian sad urat bigabeg a

¹⁹ N̄ai tamol ta san urat bigabeg tia ya, an lo seg ilog nam n̄ator dugo kawan n̄umado da. Ago bo man n̄ai seg iginiag tamolpein fidian sad urat bigabeg n̄ilasag n̄umado da. Ata wo? Idaisuda tap, tamolpein wei geig ilod n̄ijanep n̄añal pe Kristus san na mau a. ²⁰ Juda adi malad lo n̄ai Juda tamol igo won̄ n̄ilasag n̄umado ya, ata wo, Juda aenta Kristus o ka n̄añal a. N̄ai Moses san kubiaen̄ paen na ta n̄umado na da, ago bo man tamolpein a Moses san kubiaen̄ paen na dumado dan n̄añal san niñen o, seg iginiag go kubiaen̄ paen na n̄umado dak igo n̄ilasa ya. ²¹ Nek ago mi, saen n̄ai gob adi dadi m̄umado dan, nek ibol tamol ta Moses san kubiaen̄ in̄ lo tiag imado dak igo won̄, ago n̄ai n̄umado da. Ago dop an lo n̄ai gob aenta ka n̄añal a. (Ak man n̄ai Anut san kubiaen̄ ag tia yak ago ta n̄umado na da, tia, kubiaen̄ a n̄ai paen na n̄umado dan man Kristus awan aban mi a.) ²² Agod tamolpein a in̄aned ilo rumok dabai an tia yan malad lo, n̄ai tamol naok ago yak tamolpein amaiak aenta n̄añal o n̄ilasag

ņumado ya. Tamolpein naok sen ak fidian malad lo man, ļai iņaned kagin anek anek ņagam ņiņane ya. Man ata wo? Idaisuda tap, dal fidian ņibitinaep an lo tamolpein an aenta patud ņupasi wa. ²³ Kagin en fidian bilaluņ uyan ak faņan lo ņigane da, ata wo, murnap bar a fidian bilaluņ uyan amaiak idiraip dilasa wan lo ņututou wo ilog ago yen da.

An naon uyan ak aņane wo tinim afunip amaspalu wa

²⁴ Alon, kukok tubun ak idu dop lo tamol fidian dumaspalu wa, ago gup tamol kisaek mi iņ imug yaup geg fo isudap naon mel iņane wa. Nek ago mi aņanem madok tan na yak lo, aņ fidian tinim afunip ago ka amaspalu wa, ago dop man aņ anek anek atem Anut naon ipanaņ a. ²⁵ Saen tamolpein kukok an lo naon diņane wo ilod yen tap, iņ piteņanek wagai diganep lo tinid sakar ak, aria, an lo iņsed tinid dam kagin dupani uyanan dop, tubun mi dumaspalu wa. Ago dop iņ geg fo disudap naon diņane wa. Ak man naon an man, ai rouk igo kabuņad fo dukudi wa, agod an milaen tiap ikurņak yau a. Ak man id Kris adi idsed tinid piteņanek uyanan tupani wa, ago dop id naon ta a pempem ikurņak yau san tia yan tiņane wa. ²⁶ ņai ņaiseg tinig piteņanek uyanan ņupani da. An lo ņai ņalon uyan ak, ņai tamol imaspalug dal yapitilig yau dak igo won t ia ya, tia, ņai nek ibol tamol ta nug dufuni dugo, banin kawan ifu yau na yak ago dam tia ya. ²⁷ Tia, ņai seg tinig en ņufuni da, an lo dop tinig en dabai ka ņupani wa. ņai tinig en nek ibol ņaisag urat pinein igo won, ņai ilog ibol dan ago tinig awa yabek igane wa. Kabelan ņai

tamolpein aenta Anut san ru nfulalep duloŋ gup, kukok tubun an san taman ipaiag pe ikudag ŋau dop ŋaineg naon ŋiŋane san tia banau.

10

Bitinaek funfun niŋen o kagin agane

¹ Teig taog, ŋai ilog ibol dak aŋ mel en ilom isou a. Saen maŋanema tubum bagem fidian wagam tan kawan ak ate dutor dila duso se man, timtaen kisaek ituanaig ibargiranai se ya, agod iŋ fidian Anut iŋal go, beig igileg awan sensen yen dugo, titiŋaem dudug diau a. ² Fun an niŋen o idsad ilo sou man, nek ibol id Kris suguek tiŋaneg Kristus da tutumanig tumado dak igo woŋ, tubum bagema timtaen an lo, agod beig lo dam, suguek diŋane dugo, Moses da dutumanig dumado na ya. ³ Saen an lo iŋ fidian sisem kumaen panu san anaŋ diani dugo, ⁴ kumaen panu san you dam duluk se ya. Man dugo, iŋ fidian pat tubun ak a kumaen panu lo yak ipalu yan, dida tureŋ diabi na ya. Ago dugo you a pat an lo ibanai na yan lo duluk se ya. Agod pat an man nek Kristus. ⁵ Ago bo man, Anut tamolpein an wei mi niŋedi wo ta imat se na ya. Ago tag tan kawan ak ate dumat na yan, iŋaned kisedi an gidigheid dien se ya.

⁶ Kulob en wagam mi mok ilasa bo man, tinanou igo Anut isurnai dilasa panad dugo, id teil pe tarer a. Anut ilon man, id nek ibol iŋ digane yak igo woŋ tia ya, id ilod imasap kagin saiak tigane san niŋen o ilod bulbal an, dal nek an lo yabitanad a. ⁷ Tamolpein an aenta tubud sewak mitilaedi a ai pat nam digane yan naod na ubou dile se

ya, gug an ago ta agane na wa. An niñen o ru ta Anut san buk lo igo ibol, “Tamolpein dumasig diani duluk na gug, dumasa dutur go gidigheid dukok ila iso da.” ⁸ Agod jeit kagin agane amoi. Saen an lo tamolpein aenta ago diganeg, nal an lo mi Anut tamolpein 23,000 ifug dumat a. ⁹ Agod dam, id Anut tusoduduni dop, inñanen dabai nam mel ilod ibol ak ago igane panad o ta tigane na wa. Tamolpein an aenta Anut ago dibitinae dugo, mot wagai ak idirai dilasag dirataig dumat a. ¹⁰ Taida mi, an anurñur dan amoi. Tamolpein an aenta duñurñur se ya, an lo dugo enel ta daon panek san ak idug tamolpein amaiak ifug dumat a.

¹¹ Mel en fidian tamolpein an fo dilasa san fun man, tinanou naok naok amaiak id tile dop kagin tigane wa. Ru kulob a fidian niñedi wo yan buk lo wagam mi digire ya. Ata wo? Mel saiak saiak a dilasag muruan dupidinai na yan, id tusutip tile dop, kankan uyan ak dupanad a. Saen e gamu tumado den lo man, saen a lo mel fidian diau dutout an sumeik a. An niñen id kagin saiak ago yak tigane man Anut imoi a. ¹² Ago yan lo, on utur sakar dan ago ilo isou dop man, kagin gane wa, kabelan on udup udeg wau banau. ¹³ On lo bitinaek fidian ilasa dan senamo geig man tia ya, tia, bitinaek naon kisaek an mi dam tamolpein fidian lo ilasa da. Anut kagin ipano wa. On bitinaek dugo on lo ilasa dan ka sini san idaisuda wa. Man dugo, onane dabai dugo won ate bitinaek naok an sayani san ilon uyanan da, an niñen o in bitinaek ta onane dabai an irinani san amaiak on lo ilasa wo yabituani wa. Agod saen bitinaek ta on lo ipalu tap, dal ta lo on usol wau o ikubiai pano wa,

an lo dop bitinaek an lo utur sakar pe mado wa.

Anut mi ubou an ale dop tubud aenta patum apidinai

¹⁴ Njai turag muroug, fun an niŋen o aŋ tubud ai pat mitilaedi ubou ad ale amoi. ¹⁵ Aŋ tamolpein kankan am da ya. An niŋen o aŋsem mi ru e ŋurupaiaŋ den ka akubianip ale wa. ¹⁶ Saen id pasa tiŋane dan, gab a tiŋanep niŋen o Anut ilo uyan san bar tupani gup lo taluk dan man, idsad lukluk lo Kristus san dar an lo tututou da. Agod bret a tafutep tani dan man, idsad nuaeŋ lo Kristus tinin an lo tututou da. ¹⁷ Bret a tafutep tani dan kisaek a. Gidad id wei mi bo man, id tinid fidian Kristus tinin da tutumanig tinid kisaek tilasag tumado ya, man dugo, bret kisaek o lian an id fidian sisem tani da.

¹⁸ Aŋ fon Isrel tamolpein sad kagin ilom isou. In Anut anaŋ yai digane pani an wadan ka diani wa. Saen in ago digane dop, inŋsed tinidi an alta amaiak san Anut da dutumanip kisaek dilasa wa. Aŋ alon la yak an rumok a. ¹⁹ Ak dugo, anaŋ a tubud ai pat mitilaedi yai digane pidinai dan, in mel tubun ak ago ŋabol dak i? Tia dugo, ai pat tubud mitilaedi man, in mel rumok ak ago ŋabol di? Tia geig a. ²⁰ Ak man aŋ gidad mel en alon uyanan a. Saen gob adi in tubud ai pat mitilaedi an yai digane pidinai dan, Anut inŋsad ubou ta inŋane na da, tia, ur saiak saiak amaiak mi ubou an diŋane da. Amaiak niŋen o tubud ai pat mitilaedi sad ubou leil niŋen o sen alasa wa. Aŋanem tinimi ur sisaiak dida atumanip kisaek mi alasa man ŋai ŋamoi geig a. ²¹ Aŋ Tubun ak san gab lo, agod ur sisaiak sad gab

lo dam aluk dop, muruan ta arinjani san tia ya. Nek ago mi, an Tubun ak san tebol fo, agod ur sisaiak sad tebol fo dam atutou dop, muruan ta arinjani wak, an dam ago agane san tia ya. ²² Ak dugo, idsad kagin nam Anut tiganep ilon imasap turak susak igane wak i? Tia dugo, idaned tuod injanen tuon irinjani dak i?

Kagin fidian agane dan, Anut ilo uyan apani wo ago agane wa

²³ An imug igo abol, “Mel dugo ninen o n̄amat dan ago ka njigane wa.” Awo, an rumok a, ak man mel a fidian n̄ai ka njigane wan lulunad lo mel wei mi lou amad tia ya. Rumok, an ilom ibol dak ago ka agane wa, ak man kagin an aenta an̄anem ilo rumok dabai ipani san tia ya. ²⁴ An ninen o ru en aganuri wa. Talpein injanen madok mi uyan ilasa wo urat ta igane na wa. Tia, tamolpein aenta ilo uyan ipidinai o urat igane wa.

²⁵ Aria, mudan a didaen aben na diganeg yen dan ninen o igo n̄abol da, an ka adad pe ani wa. Ilom ta weiwei na dop kankan saian ak fidian mudan an ninen o abal yau a. Gidad mudan naok an didaen tamol dugot na dijaneyan, fun alon o asumianai san urat ta ipanan na wa. ²⁶ Man dugo, tan en Tubun ak san, agod mel tan en lo yen den dam fidian in̄san mi a.

²⁷ An ninen talpein ta igiop in̄san ab lo anan wani wo wau dop, awan wabi wo ilo ibol tap, on̄ gidad in̄san anan a ikubuneg nao na igansi an ka wani wa. On̄ anan an ninen ilo ta weiwei dop, an tubud sewak adi sadi ak ubol pe, fun ulon o sumiaek ta gane na wa. ²⁸ Ak man saen talpein ta ibol,

“Mudan en tubud sewak adi yai digane pidinai a,” ago ibol tap, an wani umoi. Agop an lo on talpein an binawi dop inanen kankan dam ta kubuli na wa. ²⁹ Onane kankan kubuli wo ago nabol man tia ya. On ulon la yak, mudan an muruan ipano san tia ya. Nai mudan naok en nani san ninen o igo ilog isou da: ata wo tamol sen ak kankan saian anda yan, nai isubanag pe ilog ibol dak ago nigane san tia yak i? ³⁰ Saen nai nunuaen dan, bubeg lo Anut o ilo uyan ru nupani da, an ninen o nai kankan uyan ak amag da anan an nani da. Aria, ata wo talpein ta, mel a ninen o nai Anut ilo uyan ru nupani dan ninen o uf igane panag dak i? Kagin naok an fun an tia ya.

³¹ Ago yak ninen o, on anan wani boi, tia, you uluk boi, tia, dugo dugo gane dan, aenta malad lo Anut inanen girager ganep tubun mi ilasa wo kagin an fidian gane wa. ³² Gidad tamolpein ta in Juda boi, tia, Juda tia boi, tia, Anut anen midaen, on mel ta ganep an lo in lulunad lo talpein kisaek ta yau idu na wa. ³³ Kulob fidian a nigane dan lo, tamolpein fidian ilo uyan nupidinai o nibitinae da. Man dugo, naineg kumaen tan en san an kagin nupani wo urat wagai ta nigane na da, tia, naisag urat funfun lo wagai niganep tamolpein fidian nibinawai o nibitinae da.

11

¹ An ninen o nai Kristus san kagin ngagam ninane ya. Nek ago mi an dam naisag kagin agam anane wa.

Kagin uyan ak ubou leil lo ya

² Nai an ɲipitianan da, man dugo, ɲaisag kagin naok naok fidian an pempem ilom isou da, agod pitejanek funfun a gubak mi an banim lo ɲidiri an anjal go, gamu dam abiai dabai dugo, ari apani uyanan da.

³ Nai ilog ibol dak mel en alon uyanan a. Tamol fidian sad gurman man Kristus, pein san gurman man inanen tamol, agod Kristus san gurman man Anut. ⁴ An niɲen o saen tamol ta in kabuɲan ituanig imado dugo gudanek igane dan, kagin an lo inɲan tamol gurman Kristus miai ipani da. Nek ago mi in kabuɲan ituanig imado dugo profet ru ibol ilasa dak tap, dal an lo dam Kristus miai ipani da. ⁵ Agod saen pein ta in kabuɲan kawan* gudanek igane da, tia, kabuɲan kawan profet ru ibol ilasa dak tap, in iwon tamol ak miai ipani da. Ago igane tap man pein an nek ibol gurman roun didawi yaup an lo

miai dupani wak igo won a.† ⁶ An niɲen o pein ta kabuɲan ituani imoi tap, gidad inanen gurman roun an itute yau a. Ak man pein an gurman idawi yau an miai ifuni tap, an niɲen o gidad in kabuɲan ituani wa. ⁷ Tamol in kabuɲan ta ituani na wa. Man dugo, in Anut san nao ɲanek tamol, agod Anut san girager ikubiai ilasa da. Ago gug pein man iwon tamol ak san girager an ikubiai ilasa da. ⁸ Man dugo, Anut pein inaneg ate tamol ta igane na ya. Tia, in tamol tinin inaneg ate pein igane

* **11:5:** Grik sad tamol kagin lo man, pein iwod ad da yan yamel misilas san ak ate kabuɲad dutuani gup, malak malak lo dutor a.

† **11:5:** Grik sad tamol kagin lo man, pein iwon an da yak jeit kagin igane dan, in gurman roun didawi yau a, an lo dop pein an malak malak miai dupani wa.

ya. ⁹ Agod fon, inj tamol iganeg pein san binawek imado wo ago ta igane na ya. Tia, inj pein iganeg tamol san binawek igo imado da. ¹⁰ Pein inj iwon tamol ak paen na imado da, an ninen inj kabunan ituanip ate ikubiai dile wak inj iwon tamol ak paen na imado da. Kagin ago igane dop, an lo enel adi dam ilo uyan ipidinai a.

¹¹ Ak man saen id Tubun ak san dal tiri dan, pein sen kisaek mi ta itor imado na da, nek ago mi tamol dam sen kisaek mi ta itor imado na da. Tia, pein inj tamol da sisem nug dubunawip dumado wa. ¹² Man dugo, wagam mok pein inj tamol tinin aenta lo ilasa ya. Ak man gamu tamol inj pein tinin lo ilasa da. Agod pein inj tamol da sisem Anut banin lo dilasag dumado da, man dugo, inj mel fidian idirai a. ¹³ An ansem mel en abitinaep ale wa. Ak dugo, pein ta kabunan kawan malak malak Anut igudani tap, an uyan ak i? ¹⁴ Tamolpein aenta kagin a ilod lo uyan dubol dan, an dam ago ipitejanad da. Man dugo, inaned ilo sou lo, tamol ta gurman roun milaen mi tap, an in sen miai ipani da. ¹⁵ Ak man saen pein gurman roun milaen mi idu yau dop man, an mel ta sinjakan san mi a. Man dugo, inanen gurman roun man, kabunan ituani wo Anut iganeg ipani a. ¹⁶ Ak man an lulunan lo talpein ta ru kagin e nurupaian den ninen man da nug mupei tap, gidad talpein an mel en ilon uyan a, man kagin naon senamo ak ta mabi na da. Agod Anut san midan aenta fidian dam ago mi digane da.

*Tubun ak san anan tani san ru
Mat 26:26-29; Mak 14:22-25; Luk 22:14-20*

17 Gamu ηai ru kagin taidam ηurupaianη o da. Ak man aηanem kagin naok naok a niηedi wo ηabol dan niηen o ηai ηupitarianη san tia ya. Man dugo, saen aη atumani man aηanem kagin saiak saiak a agane dan, kagin uyan ak agane dan iriηani da. 18 Malmalan talpein ru naok igo irupaiag go ηalon a. Saen aη midaeη fidian mi apalu atumani dan, aη luluηam lo gilek sensen dien da. An nag kitek rumok ago ilog rumok da. 19 Mel en ηai niηen o ta ilog uraru na ya, pempem Anut san midaeη luluηad lo gilek aenta dilasap yen a. Man dugo, kagin naok en lo kuai tem tile wak, enti aη luluηam lo Anut ipitianai da, agod enti dam niηen o ilon saian da. 20 Kulob a niηen o ηabol dan igo ya. Saen aη Tubun ak san anaη ani wo apalug atumani man, anaη a ani dan Tubun ak san anaη mok tia ya. 21 Man dugo, tamolpein a gamugo dupalu yan aη aenta ta atitianai na da, tia, aη anen anen aηsiganem anaη silei nam anig itout a. Talpein ta anaη tia imado yan imatigen a, ago dop aenta lukluk tinadi a. 22 Ak dugo, aη aηsiganem ab lo ani aluk dop amado san tia i? Tia dugo, aη Anut san midaeη an mel kawan ak ilom isou di? Tia dugo, talpein a anaη ad tia yan miai apidinai o ilom ibol di? ηai aηsam kagin niηen o dugo ηabol o? Dugo, aη ηupitarianη o? Tia geig a!

Jesus inη bret agod wain da inηaneg megeloum ipidinai a

23 Dugo dugo tiganep, pasa tani taluk san dal man ηurupaianη la ya, Tubun ak sen kagin an iku-biai panag a. Tubun ak Jesus, tidom a lo ager banid lo digane yan, bret inηane yabig, 24 Anut ilo

uyan ru ipani la gug, yafuteg igo ibol, “Bret en n̄aineg tinig, n̄ai an̄ n̄inemi wo n̄iganeg idu ya. An̄ igo agane dop n̄ai ilom isou.” ²⁵ Nek ago mi, anan̄ diani itout gug gab in̄ane yabig igo ibol, “Gab en man kontrak foun n̄aisag dar lo ya. Saen en aluk dop n̄ai ilom isou.” ²⁶ Man dugo, saen dugo dugo an̄ bret en ani dop, gab en lo aluk dop, an̄ Tubun ak san matej n̄in̄en abol ilasa dop yaup saen in̄ imul ipalu wa.

²⁷ An n̄in̄en o man, talpein a kankan tia yak igo bret yani, tia, gab lo iluk dan, Tubun ak tinin, in̄anen dar an dam n̄in̄edi wo aupasek igane da. ²⁸ Fun an n̄in̄en o talpein sen ikubiani ile la gup, murna bret yanip gab lo iluk a. ²⁹ Man dugo, talpein ta imug ilon igirep Tubun ak tinin ta ile ilon̄ na tap, yani iluk dan lo in̄sen tinin fo muruan tubun ak igane isuda wa. ³⁰ An n̄in̄en o an̄ lulun̄am lo tamolpein aenta dabai amad tia ya, aenta subam ifu da, agod aenta dumat la ya. ³¹ Ak man id imug sed ikubianad tile tap, Kristus bitinaek lo ta idirad na wa. ³² Gug an̄ mel en alon̄ uyan a. Rumok, idsad Tubun ak bitinaek lo idirad dugo bu ipanad da. Ak man in̄ id kududod yabi wo ago igane da, an lo dop saen in̄ tan en san tamolpein daon̄ ipidinai dan te id in̄ dida itumanad pe sisem ipitiñinad san tia ya.

³³ Nai teig taog, fun an n̄in̄en o kagin igo ari wa. Saen an̄ anan̄ ani wo apalup atumani man, gidad nug atitianip sisem anan̄ ani wa. ³⁴ Talpein ta imatigen saian tap, gidad imug in̄sinan ab lo anan̄ yani gup ipalu wa. An lo dop an̄anem tumanek san nun̄on man, Anut ibitinian̄ pe muruan ipanan̄ san

tia wa.

Aria, saen ηai an̄sam na ηupalu man ru kagin aenta dam ηurupaian̄ a.

12

Urgun lou panek iwae panad da

¹ N̄ai teig taog, an̄ Awan Urgun san binawek ipanad dan niñen o an̄aon̄ man ηai ilog ta ibol na da. ² An̄ alon̄ ak, saen an̄ wagam gob amado yan, an̄anem tamol kagin wagam an naom diraeg an lo tubud sewak adi a awad tia yan sad ubou ale se ya. Ago yan lo ur saian saian an an̄ diñlian̄ go kagin uyan tia yan naon sensen dukubiai ale na ya. ³ Amaiak niñen o ηai ηurupaian̄ da. Talpein ta Anut anen Urgun lo Jesus imisilani san tia ya. Nek ago mi, talpein a igo ibol dan, “Jesus in̄ Tubun ak,” tamol amaiak Awan Urgun lo mi in̄in̄en̄ da. Man dugo, ur saiak ta ago ibol ilasa san tia ya.

⁴ Aria, Awan Urgun tamol anen anen atem lou panek naon sensen ipidinai da. Ak man Awan Urgun e binawek en iwae pidinai den man kisaek a. ⁵ Nek ago mi id anen anen atem dal wei mi sensen lo Tubun ak o urat ka tigane wa, ak man Tubun ak e in̄san urat tigane den man kisaek a. ⁶ Taida mi, Anut tamolpein anen anen biabi binawek naon sensen ipidinai da, ak man Anut e tamolpein fidian ilod lo binawek en idirai dilasa den man kisaek a.

⁷ Aria, Awan Urgun tuon man id tinid ilon lo walal isi dugo tile da. Ak man in̄ id anen anen atem dabai naon senamo ak ipanad da, an lo man id anen anen dabai a tiñaneg tabi dan urat tupani wa, ago dop an lo id fidian sisem uyan tiñane wa.

⁸Urgun san dabai log, talpein ta ru kankan milaan anda yak inane dugo, Urgun naon kisaek an lo mi, talpein sen ak ru manau anda yak inane da. ⁹Ta Urgun anen dabai lo ilo rumok tubun ak inane dugo, ta Urgun kisaek mi lo subam adi ikubuniaai san dabai inane da. ¹⁰Ta kulob girager naok naok igane san dabai inane dugo, ta profet ru ibol ilasa san dabai inane da. Ta ilon lo ur uyan ak ur saian ak itarpasai san dabai inane dugo, ta tamolpein sen ak sad muroud ru lo ininjen san dabai inane da. Agod ta in muroun ru naok ago yan ilon dugo fun ibol ilasa san dabai inane da. ¹¹Lou panek emaiak fidian man Urgun kisaek mi ipanad da, agod en in sen ilon ibol dak ate mi tamol kisaek kisaek iwae pidinai da.

Tinik kisaek mi, gug tinik san boi wei mi a

¹²Tamol tinin kisaek a, ak man in san njen, banin, tinin aenta dam fidian wei a. Agod tinin aenta an fidian dutumanig tinin kisaek mi ilasag yen da. Kristus dam nek ago ya. ¹³Man dugo, id fidian Ur kisaek mi nam suguek tinaneg, an lo tutumanig tinik kisaek tilasag tumado da. Gidad id aenta Juda, tia, aenta Juda tia yak, aenta urat bigabeg adi, aenta kawan tumado tator da, Anut id fidian Urgun kisaek mi lo taluk o ipanad a.

¹⁴Aria, tinid boi kisaek man tia ya, tia, tinid man boi wei mi a. ¹⁵Ak dugo, nai neg igo ibol, “Nai banig tia ya, an njen o nai tinig en san boi tia ya,” ago ibol tap, rumok, in tinik an inanen boi mok tia i? ¹⁶Tia dugo, kududo dam igo ibol, “Nai malag tia ya, an njen o nai tinig en san boi tia ya,” ago ibol tap, rumok, in tinin an inanen turan mok tia

i? ¹⁷ Tia, tinik an fidian malak mi tap, an niñen o dugo woñ ru ilon ak i? Tia, tinik an fidian kududok mi tap, dugo woñ mumalun iwen ilon ak i? ¹⁸ Ak man rumok, Anut inanen ilon yen ak iri panim, tinid san boi anen anen atem inaned abed kisaek kisaek ipidinaig dien yau a. ¹⁹ An niñen o tinid an gigin kisaek mi yen tap, tinid an nuñon tia ya. ²⁰ Amaiak niñen o tinid anen boi wei mi a, ak man fidian dutumanig tinid kisaek ilasag yen da.

²¹ Malad in banid irupe, “Ñai on ñamoi a,” ago ibol san tia ya. Nek ago mi kabuñad dam in ñied irupe, “Ñai on ñamoi a,” ago ibol san tia ya. ²² Tia, tinid sad boi aenta a dabai an tia yak tabol dan, inñsad urat tubun geig a, an lo tinid boi boi an ta dien na tap, tinid an imat a. ²³ Tinid aenta man tile uyan san tia ya, an niñen o tamol in tinin an damag ipani da. Damag nam ibalfutani da, ago dop san leil man uyanan a. Agod tinid aenta man malak malak tile san tia ya, an niñen o in imiani uyanan da. ²⁴ Ak man talpein tinin a leil lo uyanan an in damag ta ipidinai na da. Man dugo, dal an lo Anut tinid sad boi fidian itumanai a, tinid sad boi a leil lo uyan tia yan, yañad tisini da. ²⁵ Anut kulob ago igane yan lo, gilek ta tinid lo yan ta yen na wa, an lo dop tinid sad boi fidian nug kagin dupani uyan a. ²⁶ Fun an niñen o saen tinin aenta an kisaek madai ile tap, tinin aenta dam muruan naon kisaek an disini wa. Agod fon talpein tinin ta kisaek niñen o ilon uyan tap, tinin aenta an fidian ilod uyan a.

²⁷ Aria, an fidian man Kristus tinin, agod inanen tinin san boi fidian man ansem mi a. ²⁸ An lo man tamolpein fidian Kristus san midaen ilon lo

mi urat digane wa. Agod Anut urat tamol naon sensen itarpasai da. Malan te mok in aposel adi ipilianai a, agod tinin te profet adi ipilianai a. Uraru an tinin te man girek manau adi, an patun fo man talpein a kulob girager urat digane dan, an patun fo talpein a subam dupasi yau san dabai ad da yan, talpein a tamolpein aenta dibinawai san dabai diñane yan, tulek tamol adi, tia, pein tulek san dabai diñane yan, agod murna geig man, talpein a tamolpein sen ak sad muroun ru ka diñinon a, ak man ru an fun ta dulon na wa. ²⁹ Ak dugo, talpein Kris ak fidian aposel adi ak i? Tia, an fidian profet adi ak i? Tia, an fidian girek manau i? Tia, an fidian kulob girager ka digane wak i? ³⁰ Tia dugo, an fidian subam digane itout san dabai diñane yak i? Tia, an fidian muroun ru sensen ak fun ta dulon na yan lo ka diñinon ak i? Tia, an fidian ru naok ago yan san fun ka dulon pe dubol ilasa wak i? Tia geig a. ³¹ Bar en fidian uyanan a, ago gug aenta uyanan geig a. An ninen o an tinim nutum lo bar a aenta dirinanai dan anjal pe urat apidinai san ninen o yaes ifunan a.

Ilo panek an mel malan te ya

Aria, nai gamu an kagin dugon in uyanan geig ak agane san nukubiaip ale wa.

13

¹ Nai tamol in enel da sad balek sensen lo ninon ka nigan wa, ak man nai ilo panek ag tia yak tap, nai nek ibol liliñan tubun ak tamolpein kududod lo uyan tia yak, tia, dou ta a tamol isue saian dugo liliñan kawan ilasa yau dak igo won a. ² Nai profet

ru ka nabol a, agod mel mianuk ak fidian fud nalon uyan a, agod taida mi nai manau fidian amag da ya, agod naisag ilo rumok lo mi nabol pe tan bubun ta isuk yaup asau mi itur a, ak man nai ilo panek amag tia yak tap, nai tamol kawan mi a. ³ Nai naisag filiang an nuwaep tamolpein a melmel amad tia yak dijanane wa, agod nai tinig en ager banid lo njiganep yai lo dimiriag a, ak man nai ilo panek amag tia tap, urat naon taidam njijane san tia ya.

⁴ Ilo panek kagin in muruan fidian isini da, agod ilo panek kagin dam tamolpein fidian ilon imujanai da. Ilo panek kagin in malan ta isi na da, sen ta ipitiani na da, agod sen yanjan ta yabisa na da. ⁵ Ilo panek kagin in kagin naok saian ak ta igane na da, in sen mi wo ilo sou ta igane na da, in ririan ilon imasap ta tinjan saian na wa, in muruan a tamolpein dupani an ta ilon isou na da. ⁶ Ilo panek kagin san leil lo man, kagin saiak an ta bulbal na ya, tia, ru a rumok an ninjen o mi uyasusai iganep imado da. ⁷ Ilo panek kagin man pempem aenta ibargiranai dugo, pempem ilon lo rumok da, agod pempem mala nouk imado dugo, pempem muruan lo itur sakar da.

⁸ Ilo panek kagin pempem yen da, itout yau san tia ya. Ak man tamolpein gamu profet ru dubol ilasa bo man, murnap profet ru an itout yau a. Gamu talpein aenta tamolpein sen ak sad muroun ru lo dijinjen dak gug fun ta dulon na da, ak man murnap kagin an itout yau a. Agod gamu aenta Urgun san dabai lo in manau amad da ya, ak man murnap lou panek an itout yau a. ⁹ Man dugo, gamu idsad manau ta idaisuda na ya, an lo id talon

ak man kitek uyan a. Taida mi, id profet ru mi kitek ka tabol ilasa wa. ¹⁰ Ak man murna dop saen nal a lo mel fidian itaotan dilasap yen dan ipalu man, kagin a kitek itaot an fidian ditout diau a. ¹¹ Saen ηai nanuk tusag man, ηai nanuk igo won ηiηiηeη se ya. Agod ηai nanuk igo won ilo sou ηigane dugo ilog igire se ya. Ak man saen ηai tamol tubug man, ηai nanuk sad kagin ηigane se yan fidian patug ηupani a. ¹² Gamu man id ka abanη kitek tile da, nek ibol tig siηaokan tia yak lo mitilaen kuai te ta tile na dak igo won a. Ak man murna dop id Anut da nug naon tupanip nug tile wa. Gamu ηai maηau kititik amag da ya, ak man murna dop ηaisag maηau Anut niηen o man idaisuda wa, nek ibol Anut sen ηai ilonη uyanan ak igo won a.

¹³ Ago yak niηen o mel utol en dien diau da, ilo rumok, mala nouk, agod ilo panek. Ak gug mel utol en luluηad lo ilo panek mi iη malan te ya.

14

Profet ru iη balek sensen ak da

¹ Anη ilo panek san dal mi ari apani wa. Ak man anη dam urat wagai agane dop Awan Urgun san dabai lo binawek sensen ipanaη an anηane wa. Ak man mel malan te man anη Anut asumiani dop, profet ru abol ilasa san dabai ka ipanaη a. ² Man dugo, talpein ta tamolpein sen ak sad muroun ru lo iηiηeη dak gug, fun ta ilonη na dan, iη tamolpein aenta ta irupidai na da, tia, iη Anut mi irupei da. Rumok, tamolpein ru an fun ta dulonη na da, man dugo, iηanen ur nam melmel a mianuk lo dien dan

mi ibol ilasa da. ³ Ak man, tamolpein ensauta a profet ru dubol ilasa dan, tamolpein aenta durupidai dulonj da, an lo dop dabai dupidinaip, ilod diabisa dop didiraip bubed maror anda dumado wa. ⁴ Talpein inj balek naon sen ak lo, ru fun ta ilonj na yak lo injinjen dan, inj mi sen ibinawi da. Ak man talpein a insinan muroun ru lo profet ru ibol ilasa dan, inj midaen an fidian ibinawai dugo inaned dabai nen igane isuda yau da. ⁵ Rumok, an anen anen balek ru sensen ak lo ka aninjen o naj ilog ibol da. Ak man gidad, naj ilog tubun geig ibol dak an fidian ka profet ru abol ilasa wa. Talpein enti profet ru ibol ilasa dan, inj talpein a balek sensen ak ate injinjen dan irinani da. Ak man talpein balek sen ak lo injinjen dop fun dam ifulalep tamolpein kuai tem dulonj tap, inj talpein a profet ru ibol ilasa dan da naon kisaek a, man dugo, inj dam midaen fidian dabai ipidinai da.

⁶ Aria, teig taog, naj ansam na npupalup balek ru sen ak lo mi nininjen dop alonj tap, kagin an dugo wonj ibinawanj ak i? Ak man naj mel ta njonamin lo Anut ikubiai panag an, tia, manau foun ak ta, tia, profet ru ta, tia, ru ta manau ipitenjanan dan npunanaj tap, kagin an mi nunon anda ya. ⁷ Anj melmel e kumaed tia en, dum boi, tia, digadug boi, lilijan digane ilasa dan ninedi wo ilom isou wa. Talpein inj digadug ibali saian dop man digadug san lilijan talonj uyan san tia ya, ago dop lilijan an tamolpein ditari san unjon ipidinai a. ⁸ Tia, talpein ta inj ager san dou bilalunj isue wa, ak man inj bilalunj isue saian tap, enti inj wagai yau san tawanj iganep imado wak i? ⁹ Nek ago mi, saen

on balek ru fun ta ulon na yak lo ninen tap, en dugo won tamolpein onane ru a ubol ilasa dan fun dulon ak i? Onane ru an nunon tia wa. ¹⁰ Rumok, tan en lo man muroun ru wei mi dien da, ak man muroun ru fidian an lulunad lo ta kisaek in fun an tia yak ta yen na da. ¹¹ Ago yan lo, gidad talpein ta muroun ru lo ininen da, ak gug ru e ibol den fun ta ninane na tap, inisan leil lo nai nek ibol tamol gol ak igo numado da, agod in dam naisag leil lo tamol gol ak igo won imado da. ¹² Ananem tumanek lo kagin naok ago yan dam yen da. Amaiak ninen o jurupaian da, an fidian ilom tinim imasag, Urgan san lou panek anane wo ilom tubun mi ibol dan ninen o, lou panek a ananem midaen dibinawaip dabai ad da dumado wan mi ananep, tinim inane fute wo maeg aganep anane wa.

¹³ Fun an ninen o talpein inisan ninen fun ta ilon na yak lo ininen tap, gidad in Anut isumiani dop ru fun ilon pe ibol ilasa san dabai an ipani wa. ¹⁴ Man dugo, nai balek ru sen an fun ta nalon na yak lo ngudani tap, naineg nutug mi igudani da, ak gug naineg kankan an nunon an tia ya. ¹⁵ An ninen o en dugo tigane wak i? Saen ta man naisinag ur san ilobol fom gudanek nigane wa. Agod saen ta man naisinag ilo sou lo mi gudanek nigane wa. Nek ago mi, saen ta man naisinag ur san ilobol fom bar nabi wa, agod saen ta man naisinag ilo sou lo mi ru nalon ak lo bar nabi wa. ¹⁶ Ak dugo, on balek ru sen ak fun ta ulon na yak lo Anut yan wabisa dak tap, talpein a onsa midaen lo gamugo iladu dan, onsa gudanek an dugo ibinawi wak i? In onsa gudanek ilon pe “rumok” ago ibol san tia ya, man dugo,

gudaneke a gane dan fun ilon san tia ya. ¹⁷ Rumok, dag on Anut yan an wabisap ilo uyan pani uyan da, ak man on talpein en ta binawi na da.

¹⁸ Nai Anut ilo uyan ru nupani da, man dugo, dabai a Anut ipanag an lo nai balek sen ak ate nininen dan, dabai a an kagin kisaek an mi agane wo ipanag an irinani da. ¹⁹ Ak man gidad, saen nai tumanek lo numado tap, naisag ru en tamolpein aenta ipitenani o namat da. Fun an ninen o gidad nai ru wei an tia tamolpein dulon uyan san an mi nfulale dop in dulon a, kabelan balek ta lo nai ru wei mi nininen dop in dijon banau.

²⁰ Teig taog, an nanuk igo won ilom ago isou yau dan amoi a. An nek ibol nanuk adi kagin saiak digane san ta dulon uyan na yak igo, an dam kagin naok an lo ujon am amado wa. Ananem kankan lo man, an nek tamol busumak igo won amado. ²¹ Aisaia san girek lo tamolpein a Anut awan duparsisali se yan ninedi wo irupaiad da. Anut igo ibol,

“Tamolpein balek sensen dininen dan lo,
 agod tamolpein gol ak awad lo dam,
 naineg tamolpein ru nurupidai a.
 Ak man gidad nai ago nigane bo man,
 in nai awag ta diabi na wa.”

²² An ninen o, balek sen ak tamolpein fun ta dulon na yan lo dininen dan, Anut tuon kuai tem kob ta ilo rumok adi kulob an ta ikubiai pidinai na da, tia, kulob an man tamolpein a ilod lo ta rumok na yan insad mi a. Ak man, profet ru an ilo rumok an tia yak insad man tia ya, tia, profet ru an ilo rumok adi insad mi a. ²³ Amaiak ninen o, saen midaen dutumani man, tamolpein ilod lo rumok

tia yak boi, tia, tamolpein manau tutubun tia yan boi, in tumanek lo diladu dugo, anŝam balek lo ru fun ta duloŋ na yak ate anjineŋ dop duloŋ tap, in ilod lo an njineŋ burau agane dak ago dubol a. ²⁴ Ak man saen an fidian profet ru abol ilasa dugo talpein ta patun fo yak anŝam tumanek lo ipalu tap, ru fidian e ilon den ilon isue dop in kuai tem ile wak in aupasek tamol. ²⁵ Agod mel a buben ilon lo imianuk an fidian dutufulal pe walal te dien dop ile wa. An njineŋ o in yau idup Anut ubou an ile dop igo ibol, “Rumok, Anut an da amado da!”

²⁶ Nai teig taog, gamu anjanem tumanek lo kagin uyanan agane san njineŋ igo njurupaian da. An anek anek atem mel ka agane wa. Tamol ta in bar inane ipalu wa, tamol ta pitejanek ibol ilasa wa, tamol ta in Anut san na ru ilon pe tamolpein irupidai duloŋ a, tamol ta in balek ru fun ta ilon na yan lo injineŋ ilasa wa, agod tamol sen ak inŝan ru an fun ibileksa da wa. An kagin nek an anŝam midaen dabai ipidinai o mi agane wa. ²⁷ Saen an luluŋam lo tamolpein aenta ru fun ta duloŋ na yak lo dinjineŋ tap man, gidad amoip talpein uraru boi, tia, utol boi, ago ka dinjineŋ a, subuŋan taida man tia wa. Agod in sisem ta dinjineŋ na wa, tia, ta imug injineŋ yaup itout gup, tinin te ta ibol ilasap, ago iri iri wa. Taida mi, talpein sen ak inŝad ru ibileksa san dam imado wa. ²⁸ Ak man talpein ta in atna ru ibileksa san tia tap, in tumanek lo ta dinjineŋ na wa. In Anut da ka dinjineŋ ak, agod nek inŝed ilod lo mi dinjineŋ a.

²⁹ Aria, saen profet adi midaen durupidai dop man in uraru boi, tia, utol boi ago dinjineŋ a. Ago

dop tamolpein aenta man kududod mi dugurep ru dubol ilasa dan dukubianip dile uyan a. ³⁰ Ak man saen Anut n̄in̄eŋ ta tamol siŋire na yan ikubiai panip ibol ilasa tap, talpein a imug in̄in̄eŋ an imoip awan itau kisaek oŋ dop, tamol neinta an ka in̄in̄eŋ ilasa wa. ³¹ Man dugo, aŋ fidian ka profet ru abol ilasa wa, ak man kisaek imug in̄in̄eŋ itout gup, fon sen ta in̄in̄eŋ da wa. Dal en lo aŋanem tamolpein fidian piteŋanek uyanan diŋane dop, bubed yabisap dumado wa. ³² Kabelan aŋ ilom lo tamol Anut awan ilon̄ dan ririan ru ibol ilasa dak ago abol banau, ago tia ya. Man dugo, Anut anen profet adi dabai ipidinai an lo in̄sed n̄tudi ka ditirni wa. An n̄in̄eŋ o in̄ Anut awan dulon̄ an ilod lo yen yaup in̄aned saen ilasa dan te gup, ru an tumanek lo dubol ilasa wa. ³³ Man dugo, Anut man in̄ sun̄eŋek san Anut tia ya, tia, in̄ maror san mi a.

³⁴ Aŋsam tumanek lo pein n̄in̄eŋ ta digane na wa. Man dugo, kagin naok ago yak panu panu midaeŋ aenta lo ago digane yau da. Maŋ in̄ tumanek lo diŋin̄eŋ man mamoi a. An n̄in̄eŋ o nek ibol kubiaeŋ ibol ak ago, in̄ iwod tamol ak paed na mi dumado wa. ³⁵ Agod in̄ mel ta n̄in̄eŋ o dumat pe dusumiai tap, in̄ dumul ab lo diau gup iwod tamol ak dusumianai dop ru an fun durupidaip dulon̄ a. Man dugo, saen pein ta tumanek lo malak malak in̄in̄eŋ tap, in̄sen miai ipani da.

³⁶ Ak dugo, aŋanem tumanek in̄ aben a dugon te Anut san ru imug ilasa ya, an rumok ak i? Tia dugo, Anut san ru panu panu aenta lo ta yau na ya, tia, aŋsam na mi yau a, an rumok ak i? ³⁷ Talpein ta in̄ ilon lo in̄sen profet ak ibol, tia, in̄ ilon lo Awan

Urgun lo bar dabai ak injane ibol tap, in gidad mel en ile ilon pe ilon kisaek a, ru e naj nigireg anjam na njiganep ipalu wo den man Tubun ak awan njigire da. ³⁸ Ak man talpein an ru e njigire den ninen o ikikai tap, an ninen o saen injen injinen man an kududom ta agure na wa.

³⁹ Aria, mel en ninen o naj ru wadan njurupaian da. An ilom tinim imasap profet ru abol ilasa wan ninen o tubun mi amat a. Agod tamolpein aenta balek ru fun ta dulon na dan lo dinjen san an ta apadau na wa. ⁴⁰ Ak man mel fidian agane dan an kagin itaot agod kagin uyanan ak lo mi agane wa.

15

Kristus imat go fon kumaen imasa da ya

¹ Naj teig taog, gamu naj bilalun uyan ak e imug njabol alon en ninen ilo sou njupanan o njamat da. Bilalun uyan en an banim afulaleg anjane dugo bag an fufo anjanem madok Kris ak aganeg dabai anda yen da. ² An ru a gubak mi njufulale panan an mi abi sakar tap, bilalun uyan en lo Anut patum ipasip injilian a. An ru an fidian abi yau dak i? Tia dop, anjanem ilo rumok an kawan a.

³ Mel fidian naj kududog ilon an njaisag leil lo malan te ya, an ninen o naj mel tutubu yan fidian an njurupaian a. Naj igo njabol a. Ru ta Anut san buk lo yen dan iri panim, Kristus idsad aupasek isuas o imat a. ⁴ Agog in disareg nal utol yau gug fon Anut matej lo ifufuni yabisag kumaen ilasa da ya. Agod an dam ru ta Anut san buk lo yen dan iri panim nunon ilasa ya. ⁵ Agog malmalan Pita naon na walal isi a, agog tinin te megeloum 12 an naod na

dam kuai tem ilasa ya. ⁶ Agog murna in fon walal isig malak malak dile ya, atna ilo rumok adi in dile yan sad sutek 500 irinani a. Tamol a in dile yan kisaek kisaek dumat la ya, ak man wei mi gamu dumado yau da. ⁷ Murnag Jems san na ilasa ya, agog fon aposel fidian sad na dam ilasa ya. ⁸ Agog murna geig man naisag na ilasa ya. Nai man nek ibol nanuk foun gamugo dugo tinan ririan igansi ak igo won a, ago bo man Jesus sen ikubiai nile ya.

⁹ Man dugo, nai Kristus san aposel aenta luluḡad lo yanag tia ya, agod nai yanag aposel dubol dan ta idaisuda na ya. Man dugo, nai Anut anen tamolpein nusubanai o nukudai dugo muruan wei mi ḡupidinai se ya. ¹⁰ Ak man Anut san ilo muḡanek log gamu nai inḡsan urat tamol mok ḡumado da. Agod taida mi, inḡsan ilo muḡanek nai ipanag an nuḡon ifu a, man dugo, nai urat wagai geig ḡigane se ya, an ninen o naisag urat wagai ḡigane dan aposel aenta fidian sad urat irinani a. Ak man nai seg kisaek urat ta ḡigane se na ya, tia, Anut in nai da ya, inanen ilo panek an nai urat ḡigane wo dabai ipanag se ya. ¹¹ Aria, gidad nai ru ḡurupaian go alon se ya, tia, aposel aenta ru dubol go alon se ya, ru a man fidian murupaian go alon se yan naon kisaek mi ya, agod ru en ninen o mi an gubak mi ilom lo rumok a.

Tamolpein afon kumaed dumasa wak san ru

¹² Aria, man Kristus maten lo fon kumaen imasa da yan murupaian se yan rumok tap, en ata wo an luluḡam lo tamolpein aenta, tamolpein a dumat la yan in fon kumaed dumasa san tia dubol dak i?

¹³ Kududom agure uyanan a. Tamolpein a dumat

la yan fon kumaed dumasa san tia yak abol man, an ninen o Kristus dam kumaen ta imasa na ya. ¹⁴ Ago yak ninen o, Kristus fon kumaen ta imasa na yak man, man sama ru mufulale panaŋ se yan kawan a, agod aŋanem ilo rumok an dam kawan a. ¹⁵ An lo man, taida mi ru a gubak mi Anut ninen o mabol se yan ru sewak mi a. Fun an ninen o Anut malan lo maŋ sewak tamol mi a, man dugo, maŋ gubak mi malak malak ru igo mabol ilasa se ya, Anut mi Kristus mateŋ lo ifufunig fon imasag gamu kumaen imado da. Gug tamolpein a dumat la yan fon kumaed dumasa san tia ya, an rumok tap, aria, Anut Kristus ta ifufunig fon kumaen imasa na ya. ¹⁶ Man dugo, nek ibol ŋai gubak mi ŋurupaiaŋ ak ago, Anut tamolpein dumat la yan, fon kumaed ta idirai dilasa na dak man, iŋ Kristus dam mateŋ lo ta iŋane imul na ya. ¹⁷ Aria, Kristus fon ta kumaen imasa na yan lo man, aŋanem ilo rumok an kawan a, ago tag Anut aŋanem aupasek ta ipare idu na ya. An lo murnap aŋ adeg au a. ¹⁸ Taida mi, tamolpein a Kristus ilod lo rumok go dumat la yan, iŋ dam dideg diau a. ¹⁹ Fun an ninen o ŋai igo ŋurupaiaŋ da. Idsad mala nouk Kristus lo yan tan en lo mi ka ibinawad a, an rumok tap, man id buraurau geig a. An lo man tan en san tamolpein, rumok, tamolpein aenta ilod kitek imuŋanai a, ak man id niŋed o mi ilod tubun geig imuŋanad a.

²⁰ Ak man Anut Kristus ifufunig yabisag fon kumaen imado dak, an ru rumok a. Kristus iŋ malmalan mateŋ lo kumaen imasa ya, kulob an lo idsad mala nouk an, tamolpein a gamu mateŋ

lo njon diabi dan murnap fon dumasap kumaed dumado wan, nunjon ilasa wa. ²¹ Nek ibol tamol kisaek mi lo materj ilasa yak ago, tamol kisaek mi lo dam tamolpein a dumat la yan fon kumaed dumasa da wa. ²² Id fidian man Adam malan kubulan, an ninjen o id fidian tamat a. Nek ago mi, tamolpein a fidian Kristus lo dumado dan, Anut murnap ifufunaip fon kumaed dumasa da wa. ²³ Ak man id anen anen atem idsad saen lo mi a. Kristus sen malmalan imasa la ya, agog inj patun fo, saen afon tan en lo imul ipalu dan, tamolpein a injsan an fidian fon kumaed dumasa da wa. ²⁴ Murna gup saen wadan ipalu wa. Ak man saen an gamugo dop Kristus tamol gurman fidian, tamol yanad anda yak, agod dabai funfun an fidian inj ibiai dudu dop inj abed injane wa. Agod wadan geig man inj injsan tamolpein injal pe Taman Anut banin lo idirai a, ago dop Kristus sen injaned gurman imado wa. ²⁵ Man dugo, Kristus mi tan en lo kinj imadop yaup, Anut Kristus san ager an fidian ibiai dudup Kristus njen paen na* dumado wa. ²⁶ Ager wadan Anut yabi idu man materj. ²⁷ Aria, rumok, Anut san ru igo ibol, “Anut mel fidian idiraig nanun njen paen na dien a.” Ak man ru an ago ibol bo man, id ilod itarpasi ak, ru an Anut enti mel fidian idiraig nanun njen paen na dien an dam ituani man tia ya. ²⁸ Tia, saen Anut mel fidian Kristus paen na idiri itout gup man Kristus sen Taman Anut paen na imado wa. Saen

* **15:25:** Wagam na saen tamol gurman wagai lo injanen ager tamol aenta ibiai idu dop man, saen inj sia kinj fo imasi dan te, injsan ager gurman an njen paen na imadog itokubol go ago yen a.

an lo Anut inſen mi malan te geig a, inſ mi mel fidian sad tamad imado wa.

²⁹ Aria, tamolpein dumat la yan fon kumaen ta dumasa na wa, an rumok tap, tamolpein a talpein dumat la yan faſan lo suguek diſane dan, niſedi wo dugo tabol ak i? Tamolpein dumat la yak fon kumaen dumado san tia ya, an rumok tap, aria, ata wo tamolpein sen ak inſ faſan lo suguek diſane dak i? ³⁰ Agod an maſ aſoſel adi niſema wo ilom isou wa. Ata wo nal fidian lo maſſema iginiama yai ided lo mau dak i? ³¹ Teig taog, ſai idsad Tubun ak Jeſus Kriſtus lo ſumado dugo an yaſam ſiſini da. Aria, ru an ru rumok ago tap, ru en dam ru rumok a, ſai nal fidian ſamat da. ³² ſai etna Efesa na tamol wei mi bor kaſik igo woſ dida nug mabi ſe ya. An tan en san mel mi ago tap, an dugo woſ ſai ibinawaſ ak i? Tamolpein dumat la yak fon kumaen ta dumasa na wa, an rumok tap, gidad ſai ka Anut ilog inſaon pe igo ſabol a,

“Id gamu anaſ mi tani taluk dop tumado wa,
man dugo, gabulop id tamat a.”

³³ An ſem irawaſ amoi, ſaen an tamolpein sad madok uyan tia yak dida ator tap, inſ anaſem kaſin uyan an duſuſuſi wa. ³⁴ Malam ipuk, anaſem kankan akubunep aſon aupasek ta agane na wa. ſai itaot ſurupaiaſ da, an aenta Anut anaſon da, an anaſem miai.

Murnap id tinid naon dugo tinane wak i?

³⁵ Aria, tamol ta iſumiaen pe ibol, “Tamolpein dal dugo woſ kumaed fon dumasa wak i? Agod tinid naon dugo yak diſanep ate dupalu wak i?”

³⁶ On tamol buraurau! On ulon ak, on mel patun

pae dop man an ririan ta isa kisaek on na wa. Tia, mel patun an imat gup a. Ago dop mel patun igo won yen yau san tia ya, tia, mel patun an sen tinin ibilisa dop anan foun ak igo won isa wa. ³⁷ Agod mel patun a on pae dan, murnap nujon ago mi nane san tia ya. Tia, on wit kubulan boi, tia, mel ta patun mi pae da. ³⁸ Ago gug Anut inşinan ilon gubak mi dugo yen ak lo mi, mel an patun iganep isa yaup tubun pe, inaned naod sensen atem itaot dilasa wa. Mel patun an tinid naon sensen ipidinai da. ³⁹ Mudan fidian tan en lo yan naon kisaek man tia ya. Tamolpein tinid man senamo ya, bor goun sad tinid dam senamo ya, agod anakanak in iy da tinidi sensen a. ⁴⁰ Mel a keit fufo dien dan tinid muroun anda ya, agod melmel a tan na dumado dan dam tinid muroun anda ya. Ak man mel tan na dumado dan sad girager naon kisaek a, agod mellak na dien dan sad girager naon senamo ya. ⁴¹ Ad man inanen girager naon kisaek a, ago gug kalam inanen girager naon senamo ya, patui dam sad girager naon senamo ya. Agod patui anen anen sad girager an sensen a.

⁴² Aria, saen tamolpein a dumat la yan fon kumaed dumasa wan, kulob naon nek ago yan ilasa wa. Tinid e imug tan na id tinane emaiak tisarep igan a. Tinid foun ak a murnap tinane wan in fon igan san tia ya. ⁴³ Tinik tan en san inanen leil lo man sinjakan tia ya, gug tinik murna san man sinjakan geig a. Tinik tan en san in dabai an tia ya, gug tinik murna san man dabai anda wa. ⁴⁴ Gamu id tinid man tan en san mi a, ak man saen fon kumaen tumasa da wan, id kumaen panu anen tinik tinane wa.

Tan en san tinik yen da, an rumok tap, kumaen panu san tinik dam yen da. ⁴⁵ Fun an ninjen o Anut san buk lo igo digire ya, “Tamol a imug mi ilasa yan, Adam, inj tamol kumaen ak ago ilasag imado se ya.” Ak man Adam a murna geig amaiak, sen tinin ibileksag ur ilasag imado dugo, kumaen yen yau san ipanad da. ⁴⁶ Kumaen panu san tinik imug ipalu man tia ya, tia, tinik tan en san mi malmalan ilasa ya. Ago gup tinik kumaen panu san ka tinjane wa. ⁴⁷ Tamol a malan te geig ilasa yan, inj tinin man tan gufgaf san mi a. Tamol a murna ilasa yan, inj tamol kumaen panu san mi a. ⁴⁸ Tamolpein a gamu tan na dumado dan, nek ibol tamol a imug mi tan na ilasa yak igo woŋ ago dumado da. Nek ago mi, tamolpein a murnap kumaen panu na dumado wan, nek ibol tamol a kumaen panu na ipalu la yak igo woŋ, dilasap dumado wa. ⁴⁹ Gamu id tinid san leil man nek ibol tamol a imug mi tan na ilasa yan san leil igo woŋ a. Ak man murnap, tamol a kumaen panu na ipalu wan, injanen leil dugo yen dak ago, idaned leil foun an dam naon kisaek mi wa.

⁵⁰ Teig taog, ŋai ŋurupaiaŋ da, tan en san tinid man Anut san kagin panek aben lo imado san tia ya, agod mel ta imat san, mel ta imat san tia yak injanep yabi san ta idaisuda na ya, tia geig a. ⁵¹ Kududom agurep ŋai ru mianuk ta ŋurupaiaŋ o da. Id aenta ta tamat na wa, ak man id fidian tinid ibileksa wa. ⁵² Mala ipuk ikilakil dan lo, mel en ilasa kisaek oŋ a. Saen tour murna geig an ibob dop, mel an ilasa wa. Man dugo, tour ibob pe tamolpein a dumat la yan kumaen dumasa wa, agod injaned tinidi fon imat pe igan san tia ya. Ago

dop id a tan na kumaen tumado dan tinid ibileksa kisaek oŋ a. ⁵³ Man dugo, nek ibol id kulos foun ak tinjanep tidiri dak igo woŋ, idsad tinid an ibileksap tinid foun ak imat pe igan san tia yan tinjane wa. Man dugo, mel a imat san an itout yau a, ago dop mel a itout yau san tia yan ilasap pempem yen yau a. ⁵⁴ Saen idsad tinid foun ak ago ilasa dop man, awak aban Anut san buk lo yen dan nuŋon ilasa wa. “Anut yu igane itout a, kulob an san dabai man mateŋ ituŋali pasik a.” ⁵⁵ An ninjen o id ka igo tabol,
 “O mateŋ, oŋ yu gane itout an san dabai dugon te yen dak i?”

O mateŋ, oŋane buroi an dugon te yen dak i?”
⁵⁶ Mateŋ anen buroi man aupasek mi a, agod aupasek san dabai man Moses san kubiaen lo yen da. ⁵⁷ Ak man id Anut ilo uyan ru tupani wa! Man dugo, in idsad Tubun ak Jesus Kristus lo idirad go yu tigane itout a, an lo man mel an fidian sad dabai tibiai dudu ya.

⁵⁸ Teig taog, fun an ninjen o anjanem ilo rumok lo atur sakar a. Mel ta idiraŋ pe ta asuk amul na wa. An pempem ansem ilom tinim fidian lo urat agane wo dan Tubun ak apani wa. Man dugo, an alon ak anjanem urat wagai agane dan nuŋon ta ideg yau san tia ya.

16

*Korint adi Jerusalem tamolpein o moni dutu-
 mani san ru*

¹ Gamu ŋai an moni atumanip Anut anen tamolpein Judea na dumado dan abinawai san ninjen o ŋurupaian da. Nek ibol ŋai midaen Galesia

tan lo dumado dan ηurupidai ago mi an dam ago agane wo ηurupaian da. ² Ubou kisaek kisaek atem an sam urat naon moni an aenta sen gigin na adirip yen a. Tubun mi ηane dop tubun mi pani wa, kabelan ηane dop kabelan pani wa. Ago dop man saen ηai ηupalu dan te dop, an fon moni o urat wagai ta agane na wa. ³ Agod taida mi, an tamol aenta fudi alon uyan ak apilianai a, agod saen ηai an sam na ηupalu dan te gup, an sam binawek moni agane yan disinip Jerusalem na diau a. Nai atna Korint na ηupalu gup, tamol Jerusalem na diau an, girek banid te tiganep disini diaup, matu gurman Jerusalem na yan, an sam binawek agane yan fun irupidaip dulon a. ⁴ Go ηaiseg dam ηau wo ilog ibol tap man tamol an ηai luag disap mau a.

Pol ru kagin funfun Korint adi irupidai a

⁵ Nai Masedonia tan lo ηaup ηamul gup, afon an sam na ηupalu wo ilog yen da. Nai Masedonia na saen milaen ta ηumado na wa. ⁶ Agod saen ηai an sam na ηupalu dan, ηai dap saen kitek milaen mi an da tumado wa. Nai tim tubun ipalu dan san saen lo tumado yaup tim itout ak boi. An lo saen idaisudap ηai aben dugon te ηau o ηupiliani dan, binawek an ta ηai onte ηau san ka apanag a. ⁷ Nai gamu an sam na ηupalup ηilian o ilog ta ibol da, man dugo, ηai an da saen katukan mi ka tumado wa. Ak man Tubun ak ilon ibol tap, murnap ηai an da kitek saen milaen mi tumado wa. ⁸ Gug gamu man ηai igo Efesas na ηumado yaup Judea lo Pentikos san tumanek nal ilasa wa. ⁹ Man dugo, Anut ηai dalawan ipasi panag an lo, ηai inanen urat

ka njigane uyanan mok a. Ago dugo ager tamol adi dam njaisag urat dututep itout o wagai digane da.

¹⁰ Aria, saen Timoti anjsam na ipalu tap, inj kagin apani uyan a, ago dop inj ata mel ta lo katukan dop, an ninjen ilon ta weiwei na wa. Man dugo, inj dam Tubun ak san urat nek nai njigane dak ago mi igane da. ¹¹ An ninjen o an lulujam lo talpein ta Timoti injane wo ta imoi na wa. Inj abinawi uyan ak, agop maror lo mi aganep njaisag na ipalu da wa. Man dugo, nai inj malan njiganeg njumado da, agod injsan urat kisaek adi inj luan disag dida dutor dan dam malad njiganeg njumado da.

¹² Aria, nai gamu idsad teid Apolos ninjen njabol da. Nai inj anjsam na turan aenta luad isap dida dupalu wo njusumiani a, ak man inj imoi a. Murnap injsen nal ta kawan ak ile dugup ipalu wo ibol a.

¹³ Tawan aganep amado wa. Ago dop anjanem ilo rumok Kristus lo yan mi lo atur sakar a. Ilom dabai anda amado dop dabai lo mi tamol mok amado wa. ¹⁴ Urat biabi fidian agane dan ilo panek lo mi agane wa.

¹⁵ Aria, an alon ak tamolpein a Stefanas san ab lo dumado dan, inj distrik Akaia ilon lo malmalan ilod lo rumok a. Inj injsed ilod nam Anut san tamolpein dibinawaig urat digane da. ¹⁶ Teig taog, fun an ninjen nai njududuwan da, an tamol naok ago yan awad paen na amado wa Nek ago mi anjanem urat kisaek a fidian urat awan disini wo maeg digane dan dam awad paen na amado wa. ¹⁷ Gamu saen en nai ilog uyanan da, man dugo, Stefanas inj Fotunatas da agod Akaikas njaisag na dupalu ya. Gidad an naom tia ya, an lo inj naom

diñaneg ñai ilog diabisa ya. ¹⁸ Tamol en ñai ilo maror dupanag a, agod an dam dal nek ago mi dibinawan a. Fun an niñen o tamol naok ago yan, an yanad lak na asini san idaisuda ya.

Ru wadan

¹⁹ Aria, midaen a distrik Esia ilon lo dumado dan fidian an ilo uyan dupanan da. Akwila in Prisila da Tubun ak yan an lo an dam ilo uyan dupanan da. Nek ago mi midaen a in sad ab lo dutumanig dumado dan, an ilo uyan dupanan da.

²⁰ Ilo rumok adi etna Efesas na dumado den, an ilo uyan dupanan da. Saen an nug ale dop man, musuk gun ak nam nug ilo uyan apani wa.

²¹ Nai Pol, gamu ñaisag banig nam ilo uyan ru en ñigireg an sam na ñiganeg ipalu ya.

²² An lulunam lo talpein ta Tubun ak niñen o ta imat na tap, Tubun en talpein an tinin fo misilaneke iganep yen ak ago ñabol da. O Tubun en, on palu!

²³ Tubun en Jesus in anen ilo panek an da amado.

²⁴ Jesus Kristus yan an lo ñaisag ilo panek an fidian ñupanan da. Rumok.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d